



桂宮誌

七八

ハ 6
2477
5





桂宮誌卷之七目錄



天柱編

金聲函

八反歌八首

勸孝詩十二首

示蒙偶吟二十五首

松山書屋勉人積德力學詩十八首

示諸子二十二首

廻駕詩

醒世詞

勸孝弟忠信詞

降壇叮嚀詞

示無相壇諸子

兩儀函

籤譜

附 集唐籤



桂宮誌卷之七天柱編

安南徐 珽彙輯

鷄林李培根校訂

金聲函

八反歌八首

幼兒或詈我我心覺喜懽父母嗔怒我我心反不甘
一喜懽一不甘待兒待父何心懸勸君今日逢親怒
也將親作幼兒看
兒曹出千言君聽常不厭父母一開口便道閒多管



非閒管親挂牽皓首白頭多諳練勸君敬奉老人言
莫教乳口爭長短

幼兒尿糞穢君心無厭忌老親涕唾零反有憎嫌意
六尺軀來何處父精母血成汝體勸君敬待老來人
壯時爲爾筋骨傲

看君晨入市買餅又買糕少聞供父母多說供兒曹
親未饜兒先飽子心不比親心好勸君多出糕餅錢
供養白頭光陰少

市間賣藥肆惟有肥兒丸未有壯親者何故兩般看
兒亦病親亦病醫兒不比醫親症割股還是親的肉
勸君亟保雙親命

富貴養親易親常有未安貧賤養兒難兒不受饑寒
一條心兩條路爲兒終不如爲父勸君養親如養兒
凡事莫推家不富

養親只二人常與兄弟爭養兒雖十人君皆獨自任
兒飽煖親常問父母饑寒不在心勸君養親須竭力
當初衣食被君侵

親有十分慈君不念其恩兒有一分孝君就揚其名

待親暗待兒明誰識高堂養子心
勸君漫信兒曹孝
兒曹樣子在君身

勸孝詩十二首

幼時全賴我親恩
懷抱提携饗與殮
設使當時親不在
饑寒難保命難存

萬般勞瘁有時休
育子辛勤無盡頭
能體親心行孝道
彼蒼必定遂君求

世間百行孝爲先
孝事原來可格天
父育我兮我育子
情如滴溜落堦前

人生切勿怨親貧
撫育兒時喫苦辛
有食必須留子食
有衣必定子先輪

兒有微疴親不安
維圖百計遍求干
將身欲把兒身代
涕淚汪汪相對看

父心不比子心腸
祇望兒孫代代昌
白髮老人難百歲
勸君及早敬爺孃

人生強壯漫誇才
妄把雙親常撇開
恁爾英豪無配偶
詢君六尺曷從來

昊天罔極報無休
下氣和顏敬白頭
活佛靈山難在

世志心供養無他求

孝子思親應不間親如紅日已西山門前流水依然在日向西山不再還

苦口言詞欲動人勸君循分孝於親有朝一日親年老不見雙雙空淚頻

我孝親兮盡百端留爲後代把人看芳名千古今猶在迤子頑孫心膽寒

何必靈山燒炷香只須堂上敬爹孃晨昏菽水隨時奉足保兒孫世代芳

示蒙偶吟二十五首

爲人須是識真機妄念紛乘事事非箇裏天心常體認落花流水與鳶飛

靜則空明動則流天心須向箇中求陽生於復端倪現不盡珠光日夜浮

月映波心萬派清水天一色共圓明靜虛識得本來樣自覺蟾光到處生

心如穀種具生機存則靈明放則非欲識本來真面目一輪明月透疎幃

生意融融春氣濃
鳥笙迭奏水鳴鐘
不須瑀琢資人力
爛漫天真造化工

轉盼春來忽又秋
真機活潑不停流
閒從川上淵源會
飛躍鳶魚大化周

人禽相判應須知
站立關頭莫自疑
全受全歸爲肖子
休教真種入污泥

終朝逐物放心猿
誰肯回頭認故園
欲學收心無別法
能知心放卽還元

念從熟處性從偏
一段靈明被物牽
喚醒主人翁頻照

察防閑克治最宜先

初念精明轉念紛
浮雲漸蔽起魔軍
關頭立定頻頻驗
採藥爐中細細分

神本清明爲欲昏
無端憧擾似雲屯
澄源還自雞鳴始
朝氣無亡植玉根

心作權衡萬事平
中多雜亂失真明
鑑空只爲無私照
養得心源似水清

本來無物亦無塵
明鏡高懸舊主人
元命自然生妙覺
洞觀無礙識天真

精液流通衆妙生命門謹守自充盈火從水底圓珠
現光透泥丸照頂明

湧泉本與泥丸通爲有魔軍隔萬重斷絕六根成正
覺華池神水自相融

順則長生逾卽仙河車搬運入丹田醍醐灌頂真元
合養就驪珠的的圓

血精未便是真機中有驪珠照眼眉玄息炁通無障
礙神光一點落天池

血凝精聚結爲華水火原來共一家混合坎離成旣

濟陰陽互宅是根芽

何謂先天與後天箇中消息少人傳太虛本體難名
相存想何能合自然

結胎須是結真胎一樹梨花火內栽水裏藏金金化
土五行和合上龍臺

立基不必在丹爐一念融通卽太无元父回明成妙
道空拳赤手握明珠

靜理閑存絕覩聞太和流貫氣氤氲百神混合三元
會信手拈來已十分

無忘無助是功夫功至純時用力無逸宅丹玄融太
一絲絲不絕見真吾

玄息原從祖竅生先天真種絕胎嬰圓珠寶映回風
合湛寂常明萬歲燈
道原不息妄非真息住胎凝入渾淪離相清塵空一
切無人無我亦無身

松山書屋勉人積德力學詩十八首

一年功苦在於春書史從來不負人試看宋郊身作
相元宵燈下讀麟經

文士紛紛盡舉觴金爐香靄瑞烟翔蟾宮只在心田
得行滿功成桂自芳

杏花開放滿園紅色映皇都自不同金勒玉鞍遊上
院看來只在簡編中

最是三春好讀書可人新綠滿庭除枝頭花鳥皆朋
友閉戶何妨賦索居

文章品行要相兼功到成時福自全遇合看來無一
定應知修德可回天

文章莫道竟無靈造物能司秉鑑人不信試從榜裏

看有誰苦志不成名

十年窓下做寒儒一自成名體便殊天上人間從此判雲泥只在幾行書

晝長無事可相娛閉戶蕭然賦索居箇裏會心非在遠窓明几淨只觀書

黃榜書名御墨香都言得雋在文章豈知取士先求品陰隲虧時莫入場

盛德從來籲俊英休辜黃卷與青燈鵬飛自是尋常事好趁秋風振羽翎

砍桂斧頭要早磨莫將時日付蹉跎上天本有長梯子人自因循可奈何

桂宮文籍錄寒儒莫怨天公意有殊就裏若無陰隲助空勞讀盡五車書

爲學須攀上苑花那知心上有奇葩好將方寸頻耕種桂有根原杏有芽

桂花香發廣寒宮月殿雖遙有路通用得芸窓功十載管教平步上青峰

緊把心猿仔細拴好教意馬出于欄假饒事事符天

理美報由來不用叅

梅放疎星筆硯香最可人意是芸窓工夫只在三冬

足莫負寒宵漏景長

修德行仁切莫疑此心常與道相依帝心原自無偏

向父母從來愛好兒

五鼓初敲鷄亂鳴正於此際辨人禽試從除夕從頭

算反已無虧得幾人

示諸子二十二首

青燈小屋夜如年宣化真心上合天莫說無人知此

事南宮月佩下羣仙

一片冰心徹碧霄無言無答太寥寥願之真切緣由

事善念圓時已格昭

默默真心間斷無六塵城市卽蓬壺問君他日何因

果百寶蓮臺金色軀

心月初圓性海秋隨風泛泛度生舟滂流直上無人

處山自青青雲自幽

水牛慣習闢丹田一慧圓時百福圓天地無私於萬

物隨其活潑任機玄

黃梅時節老槐青
小屋真人大夢醒
借問箇中何事
妙無形寂寂一心靈

雨餘一鑑小塘開
活潑真源晝夜來
魚子忘機荷葉
大靜看明月滿高臺

胷海無邊心月秋
玄機真妙別無求
如何透得這關
去打殺山頭經劫猴

夜靜人閒太寂寥
好談道理共逍遙
清商一曲來何
處必是仙家舞鶴簫

無是無非一事無
請君猛力學真儒
聖言妙蘊難文

字拈出花枝指道樞

與子真緣本有時
更逢今日說慈悲
度生爲急君回
首莫失蓮臺作聖期

清真小屋話從容
芳草芊芊碧樹濃
山山水水閒看
處又聽西風遠寺鐘

喫飮着衣中有惺
本來面目太丁寧
花香寂處禽聲
出不識何人此法聽

人誰無過改之真
點檢身家就日新
請子居塵能出
世心頭勿忘濟斯民

山窓寂寂靜中看半禿孤松五月寒觀物工夫卽觀性放過莫作後時歎

萬事之中太極圓一真妙法本然然清宵明月初升處竹影叅差花欲眠

九霄笙鶴下珠樓苦海深深泛願舟予是南宮如意聖爲君時到漢陽州

木落山寒天氣清小亭寂寂一香晴觀心切處無明破可笑多年執七情

君願初圓我語真我冠君服共居塵看來一相誰君

我我我君君矛盾頻

金爐銀燭夜光寒時訪舊緣飛紫鸞仙服初成多我喜大羅會上飽金丹

君依於我我依君好時際會起風雲金章天勅何心答只有案頭開化文

執手瀉懷凡幾時中宵回首大緣奇愛看諸士吾無恨將駕祥雲返寶旗

迴駕詩

連雲比屋已多年一派清溪抱嶺前綺牖照開雲外

月野鷗飛破巷中烟幾株古樹禽棲老半畝方塘草
映妍應許地靈人亦傑諸生何不勉爲賢

醒世詞

嘆人生嘆人生結冤深嗟浮世猶如草賦春急早回
頭種善根培植靈苗實果心萬般帶不去善惡二字
影隨行

勸孝弟忠信詞

稽賦畀于維皇盡舍生之有道緣後起以紛紜泯先
天之蘊奧性相近而無漓習相違而有教乃無何而

不率將往復其未肖茲欲反乎彝常總之莫先于盡
孝 且人生之挾持尤莫切于同氣自世道之日衰
手足惟私其利任八性以沉湮隨五倫之厭斁將出
入之無常忘跬步之有序今切告於羣生連枝莫要
于盡弟 緬皇天之陰騭本咸具乎大公由人心以
磔刻委正氣於溟濛爰爲已之竭力遂爲人之不同
日沿流爲今習何由反乎古風持身忘乎物我涉世
要貴于克忠 考人世之虛言初歷歷其可聽迨事
後以追維覺前言之莫證故往復以抒陳終虛矯而

更甚舉口是而心非悉規軌而矩隕待人要于毋欺
接物莫宜于克信

降壇叮嚀詞

代鸞諸生帝勅非輕鬼神密布最是嚴森諸凡行事
切莫虧心天地無私不順人情因無大小總要實行
勿聽邪說勿徒虛名不然遭劫收入沉淪吾欲普渡
再三叮嚀及早佩服觀音法文並吾懲創昭鑑甚明
勸化一個功有十零勸化十個百功準存始終化導
名書天庭吾代天化汝替我申別無戒語如是託行

示無相壇諸子

得得得問何得我所得處人自失失失問何失我
所失處人自得試看人我得失處得處何處失處何
只在天地範圍裏揔具心性活潑中範圍活潑都拋
却宛然一物昭而靈此中不有貧富機此中亦無善
惡關貧是無妨富何羨惡亦不染善無方黃金千錠
須無用白髮一莖真可畏寄語青春紅顏客莫捨晝
夜向正路正路何處卽迷津藕花原向泥中開訪蓮
不可不訪泥蓮泥何曾相違離迷者卽悟悟者迷迷

悟亦自不二門然而可憐爾世人本來消息黑洞洞
三途五濁俱自取刀山劍樹摠自作盡日所心貪嗔
癡終年行事殺盜淫飽喫安眠無餘事悅耳便目有
真味聞聖賢語驀如聾見載籍訓忽似盲論人是非
明如水敘已能拙黑似漆遇色便道前緣重聽樂却
說時日良謀得橫財稱祖德釀受實禍資墳崇諂勢
求容指爲常凌弱壓頭目爲能可憐可憐我何憐若
此世人真可憐劫劫沉淪無出期受罪受罰轉相仍
可惜世運因此類紅光漸消黑氣滋兵戈蹂躪由此

興瘟疫纏繇由此作荼毒斯民無窮已玉石俱焚稂
莠雜雖云俱焚而相雜善惡之鑑日彰明萬人同沒
善獨免千家共脫惡自當報應昭昭如影隨敢言欺
天難自欺天高聽卑無不燭一毫自欺卽欺天世人
應看如斯理急驅猿馬急回頭積惡正如臘前雪春
光一回消而融罪業消處卽成聖日之蝕兮復卽圓
初迷晚覺非獨羞古聖已許改過路改與不改管中
皮撥去管皮卽本面喻物以言亦難盡只笑只呵只
自歌我本南宮主桂仙九十七化現異跡每每忠孝

聞玉京上帝佳之授如意位證九天輔元座職受十方開化任以來刻骨無上恩晝而繼夜夜而晝導化愚頑微塵數共伴玉府金丹仙仙佛不盡衆生亦生而生生無定期我願且同生生理長得長生度無已昨於清微寶座下訴盡素懷幸蒙允方便莫過忠孝職以忠以孝正心華從有入無真常道好倚華頂摩天臍以此方便巡寰宇得人甚難果甚難雲頭鶴輪不暫停香後鸞筆無少歇紅牛之年過箕甸偶逢無心一老翁緣重義厚暫駐駕幸得清虛化真人細尋

奇緣令扶鸞漸化成習沉痾人妙虛清寧諸法弟贊左翊右通之遠惺彼玄理月共虛圓如鏡相滿碧空畢竟萬象歸太虛請君莫失虛靈志九九八十一日會說經示訓果壘壘大緣大緣此大緣難再難再寔難再諸士諸士諦聽麼開化之責果任汝筋絕骨軟莫疲厭天翻地坼莫搖曳諸士信我若四時我恃諸士如五行四時循序羣品亨五行修職庶務稱羣品亨庶務稱可見羲皇以上世社稷泰基上可奠黎庶康衢下可期漸而漸漸盡大地必也成金以後已區

區本願原如此諸士大誓更若何

兩儀函

籤譜

自序

吉凶禍福者是人心如何者也然而人心惟
 危吉凶禍福之間全昧未來之果是以聖人
 不得已以著龜之法探得天機於寂然不動
 之中逢吉則益戒淵冰以全其吉逢凶則深
 讖過罪以消其凶人能明此而去就則聖人
 教法雖泄天機亦體好生之德則聖人之深

得天機之大用而教人者良亦苦矣然而輕
 薄之徒或臨事而決疑於卜筮逢吉則謂快
 頓無臨淵履冰之心逢凶則動快全無改過
 悔罪之心蓋人心之危莫甚於近日矣一天
 之下予籤雖行多有差誤而又有自成一譜
 之意以俟好緣無相壇司鸞清虛子以諸士
 願訴予故此題之而適恭我純陽大師願助
 解文為教事甚奇異矣凡我在壇諸弟子愛
 敬是譜如對我像

第一卦

重天乾



福星高祿星爛 玉印金章自天

種德穗今結實 萬年又復千年

純陽解曰 心源自天好生同體人能知此動用

如是何福不臻此卦實德圓滿之象

常守勿失以培其根

第二卦

天風姤



天乙臨南極地 桂花香動青衫

中兼壽福多子 本是明心祈誠

純陽解曰 利物利人福報如是莫昧方便一心
做去無願不遂此卦吉星照臨之象
百事亨通無往不利

第三卦

天山遯 

紅塵世界搖搖 名姓不妨大隱
文武爐丹九還 青雲路上何近

純陽解曰 曰名曰利刀頭甘蜜急流勇退是名
丈夫誰能如是此卦絕緣修道之象
急宜回光以究心源

第四卦

天地否 

徘徊三五深宵 一片歸雲掩月
請君坐讀經書 泰運終時慎罰

純陽解曰 莫謂至樂樂極悲生大凡人生動輒
作業可憐可惜此卦圓月入雲之象
凡事暗昧不可妄動

第五卦

風地觀 

坐井窺天可笑 青山深處歸棲
人見同源我見 病盲難用刀圭

純陽解曰 有人教我以法以文虛心諦受猶恐不及莫執已見此卦偏執不回之象 自解執縛庶可接語

第六卦

山地剝



妻妾互爭閨闈 奈何家室艱難 墳墓未安可畏 陰陽改事從寬 純陽解曰 牝鷄唱晨誠恠底事雖然人孽亦崇 風水急改急改此卦門戶擾亂之象 凡事悔改自有亨路

第七卦

火地晉



事有目前好運 伊人勿失其時 進取絲毫齟齬 大材小斲今宜 純陽解曰 前緣深處後時到來人於那境勿失 晷刻方全其利此卦逢時不知之象 急宜明察以就大緣

第八卦

火天大有



物阜人安氣浩 大家從此昇平 天錫源源福祿 時時掀動仁聲

純陽解曰 莫曰自然來必有根祖宗之德積積
不小其會也否此卦家道昌盛之象
續修厥德長遠不變

第九卦

重水坎




水盈科進源源 事事來頭實地
箇中清濁分明 細察其人立志

純陽解曰 人不立志心識難辨中雖充實內有
清濁仔細看去此卦實中有分之象
凡事靜會勿為人欺

第十卦

水澤節



清儉人之福種 又兼慎事明心
、 逾順境中如是 必來世帶黃金

純陽解曰 田不春耕穀何秋收人不遠憂事多
近愁孜孜為善此卦心行雙修之象
來時桂華放香門戶

第十一卦

水雷屯




玉帳深金符佩 劍燈前擁雄兵
祕計奇謀自在 何難鎮國功名

純陽解曰 大凡治國文經武緯天有列星文武
其名不可偏廢此卦以武成功之象
百事有威兼得有聲

第十二卦

水火既濟



官高望重多時 泉石庄中可退

風柯月渚論心 從古奇緣不再

純陽解曰 月滿則虧水盈則溢進退知時亦男
兒事可退名區此卦功成身退之象
勿疑去就永斷追悔

第十三卦

澤火革



滄海桑田幾變 人情翻覆無常

小室清閒靜寂 閉門直養真陽

純陽解曰 人心如水逢風起波與世無心其誰
敢嚇勉旃勉旃此卦世事多翻之象
凡事謹慎勿關世務

第十四卦

雷火豐



青雲丹桂雙全 六宿三台南極

請君同我歸山 閑坐清談道德

純陽解曰 施德普土澤被萬民位極人臣白鬚
且星恬退其時此卦出世遯世之象
臨變知機明哲保身

第十五卦

地火明夷



經綸林下看書 莫謂頓無用處
也無妨我潛修 請看莘伊渭呂
純陽解曰 士之隱居如玉在石凡人
不識良工能知守靜莫動此卦修身待訪之象
精一謹守以待好時

第十六卦

地水師



萬夫赳赳干城 誰作其中丈人
忠君愛國寧民 其可堪同苦辛
純陽解曰 治亂之道只在用心用文尚治任武
靖亂誰堪將材此卦國訪武才之象
凡事勇決勿至遲誤

第十七卦

重山艮



玉宸消息如何 鸞駕鳳笙漸近
天人之爵雙存 修德修身慎謹

純陽解曰 山野靜處修心真切一朝丹綸招登
仙班不可違命此卦超登仙列之象
垂慈布德可行其時

第十八卦

山火賁



時運泰來身旺 可觀鼠馬其年
玉沼蓮花半坼 始知月姥前緣
純陽解曰 日陽曰陰理之妙機人之配匹應此
而然勿失妙理此卦運泰陰陽之象
孕育無限家多吉祥

第十九卦


山天大畜



牛羊繁殖年年 家財自然足富
從茲無有艱難 檢察身家辱陋
純陽解曰 業垢富垢因淨受淨垢業濁福每多
惱亂時有侵漁此卦養畜得富之象
凡事雖通終有苦端

第二十卦

山澤損



月圓三五青天 騷客空然愛惜
看看虧虧宵宵 靜會光陰變易

純陽解曰 禹惜寸陰昭在方冊浪費好日清狂
時景神所不欽此卦對景流連之象
猛省此習莫送好時

第二十一卦

火澤睽



邪見何如正見 心頭切戒茲機
閉目閒觀本性 有何是是非非
純陽解曰 耳目所好終歸罪簿改習自悟深悔
所作方可保存此卦縱目邪境之象
凡事透本以回舊習

第二十二卦

天澤履



冰薄誰能敢踏 探看順途其宜
若不時時點檢 心之所向多危
純陽解曰 歌舞筵前白日行樂莫曰行樂若也
失足誰援以手此卦不知深戒之象
凡事兢業必免大厄

第二十三卦

風澤中孚




古木心生體死 凡人不識其真
春到花花葉葉 始知平等洪勻

純陽解曰 莫謂罪大穢則無形本心回復動用
得法妙哉妙哉此卦起死回生之象
非但身生又有大慶

第二十四卦

風山漸



蓮初桂後星圓

慧月并明福月

雖云富貴無雙

更關心田勿忽

純陽解曰 天府掛名亦云多時人間享福奚不
如此務本最好此卦無福不具之象
福中修慧以通長源

第二十五卦

重雷震



名譽空然動國

靜言又且庸違

攸德潛心實地

何難逞得真威

純陽解曰 務實是貴去非亦貴心本真如須從
天理仔細看來此卦棄虛務實之象
凡事要就真實則亨

第二十六卦

雷地豫



財豐穀聚衣多

甲乙其年可待

家和人合偶然

事事無愁自在

純陽解曰 門臨吉星太日其光上下內外摠合
安康家多吉氣此卦待時迎福之象
百事有緒將有大福

第二十七卦

雷水解



官事悠家事窘 一朝太乙垂慈
人性本來至善 晝宵莫昧良知
純陽解曰 習之所造難免灾迤門福所及運適
吉星本自祖蔭此卦凶中逢吉之象
凡事長隨本心則吉

第二十八卦


雷風恒



幾劫伊來護念 蓮華佛國清緣
莫失今生立志 瓊宮來世金仙
純陽解曰 速成疾亡晚達善終根深源長來由
多劫奚止人爵此卦三生俱圓之象
福報之受不可思量

第二十九卦

地風升




玉堂十載逍遙 朝日金章太輔
蓬萊聖主恩深 甘雨和風普土

純陽解曰 水源長遠必及大海木根深立可參
碧天人體此物此卦培養發達之象
生民之福可賀可賀

第三十卦

水風井



巧計奸心異算 欺羣欺衆欺天
猛省即當改悔 來頭可免憂煎
純陽解曰 心何有惡人甘着味乃有千萬難思
之業可不懼哉此卦飾心巧奸之象
若不悔改誰回罪業

第三十一卦


澤風大過



男癡女邪大變 急宜改建先原
行善行仁切切 人之禍福無門
純陽解曰 正能克邪邪能欺天天豈受欺欺者
自欺罪無替受此卦陰剝陽氣之象
急急猛省以復真陽

第三十二卦

澤雷隨



仁天廣大慈憐 萬物均沾雨露
體於心上修行 直達仙宮一步

純陽解曰 理本如是無可造作此曰天道之常
亦曰人心之稟此卦直示天道之象
人能弘之可稱大師

第三十三卦

重風巽



噓來噓去空中 有跡無形是體

虛虛實實如斯 凡事求根採柢
純陽解曰 行善非善稱仁非仁心無相則真實
意有能則虛偽此卦虛實難辨之象
凡事立主勿至放浪

第三十四卦

風天小畜



南州八月風涼 新熟稻梁好飯

三農天下之根 故土歸耕務本
純陽解曰 人外四民民而非民寧不及士奚不
作農勿為遊食此卦以農為本之象
人得此卦食豐一門

第三十五卦

風火家人



家山消息今聞 無事之中有喜
流來毓慶縣長 如玉麟兒甚美

純陽解曰 門有大吉先生伊人莫謂我德德源
九玄善護善守此卦喜中兼喜之象
愛人愛物益繁後裔

第三十六卦

風雷益 ䷗

秋風時節天清 丹桂澹香撲鼻

誰家子弟先聞 陰隲籍中有示

純陽解曰 天心旻覆一切萬物物向冥頑為物
人向仁善為天此卦天訪善人之象
廣積陰功唾手天選

第三十七卦

天雷無妄 ䷘

龍年犬日何時 始得比和好運

惡人報惡昭昭 與子同承聖訓

純陽解曰 姑待姑待好時好緣待中作惡失緣
待中作善預時此卦教時勸善之象
凡事孜孜善境則亨

第三十八卦

火雷噬嗑 ䷔

禍福皆從一口 人人於此銘心

沉默簡言戒佩 心閒如在山林

純陽解曰 處世良方無過啞聾銘肺無人每陷
此機喪身失名此卦戒口銘心之象
人能實做可就聖胎

第三十九卦

山雷頤 ䷚

欲吐而因不吐 小人心裏如斯
似祕元非實祕 堅堅守丈夫儀
純陽解曰 真實厚朴君子氣象甘言笑目小人
巧習決辨此機此卦小人眩妖之象
於此明辨勿失威儀

第四十卦

山風蠱 ䷑

美色佳音莫近 男兒到此無何
精執雅操一實 不難降伏羣魔
純陽解曰 怠處用嚴柔處用剛凡於境界操心
操氣如是如是此卦執心降魔之象
凡事清淨自居則吉

第四十一卦


重火離 ䷔

南斗文星彩爛 摘蓮折桂無疑
宿世因緣此世 愛民忠國誠之

純陽解曰 十年青燈百家黃卷修因如是結果
如彼毫髮不爽此卦發達濟安之象
逢此者恒記於心頭

第四十二卦

火山旅



奉命率師討逆 凱歌一曲城南
聖主報功有爵 於家於國無慚
純陽解曰 男兒立志豈只藝垣從古大人無不
文武兼備之才此卦身任闖外之象
掃清妖氛四海晏靖

第四十三卦

火風鼎



元來福慧雙修 衣錦中兼饌玉
命宮天乙光臨 莫問何年仕祿
純陽解曰 福善家中又何有言益時戒損滿時
戒溢安時戒危此卦天定福慧之象
箇中省察來福無漏

第四十四卦

火水未濟



君今運隔三三 宜向山林誦習
若逢馬鼠之時 金印煌煌典邑

純陽解曰 紅塵十載所得何物青山一抹可營
棲息姑待時節此卦讀書待時之象
凡事謹慎受福不淺

第四十五卦

山水蒙



好緣具足於身 可怕奸淫損德
請君痛誓前非 或免天司籍黑
純陽解曰 喪德損名皆由此心心豈所使身之
所犯勿為形役此卦身犯淫邪之象
痛改悲懺庶幾回天

第四十六卦

風水渙



於功於利於名 切莫經營鑽穴
一毫情識牽戀 赤口連生赤舌
純陽解曰 休休百事莫莫千般運到不吉守雌
則好切聽銘心此卦百事不成之象
廣行善事必有亨通

第四十七卦

天水訟



周廟金人有戒 莫生無益閒言
可學訥於辭者 一門忠厚源源

純陽解曰 一默一仙成丹二默二仙成丹千默
萬默仙丹隨數此卦金人緘口之象
閉口操心凶消慶圓

第四十八卦

天火同人 

野色青青滿日 遊人佇立斜陽
日暮不知道遠 長堤空自徜徉

純陽解曰 自暴自棄可笑可憐曠過時節一無
檢束由何如是此卦虛度光陰之象
凡事急宜勇猛做去

第四十九卦

重地坤 

從寬從厚存心 福祿源源不斷
順天奉命真真 自有神人讚歎

純陽解曰 萬事圓圓萬行方方圓隨時妙用
無限何德不厚此卦心德寬厚之象
天之報應昭昭靈靈

第五十卦

地雷復 

陰司消滅愆尤 善籍高名已列
發斯福祿之源 盡未來難可說

純陽解曰 悔則復真由是直養莫餒莫害百福
將生萬罪永消此卦凶消吉生之象
福祿源源與天同久

第五十一卦

地澤臨



終得青雲一路 可期十載三年
大法本無定數 速遲都在心田
純陽解曰 命宮有星名曰天乙貴人自有好修
善行益格天心此卦身有功名之象
凡事益向忠勤則亨

第五十二卦

地天泰



丹鳳含書寶殿 翩翩飛下雲間
大丈夫逢聖主 濟斯民復歸山
純陽解曰 換着錦衣閒置布裙莫忘布裙錦自
布生布是根本此卦功成還山之象
凡事勿忘大本則吉

第五十三卦

雷天大壯



聲動乾坤萬物 大哉羣蟄咸醒
逸士觀來妙理 虛中寂寂中靈

純陽解曰 千萬方便不如修心清香一炷案邊
還丹九轉心頭此卦觀物得道之象
人逢此卦名聲必高

第五十四卦

澤天夬 ䷪

愛劍忽傷我手 太剛之物然然
莫近豪家勢室 自耕自稼山田

純陽解曰 爭名爭利可笑於水於山好遊知時
去就保身明哲此卦近物傷身之象
閉門山家自娛耕讀

第五十五卦

水天需 ䷄

朱雀大神自到 無為酒肉三盤
力食難須及念 從今省費澹餐

純陽解曰 暴殄天物神所痛憎趨勢諂貴何益
自守惺察保身此卦遇貴浪費之象
凡事重粟惜福則可

第五十六卦

水地比 ䷇

妄動不如安靜 請君莫起他心
以我較人事舛 簡中默默中沉

純陽解曰 靜則德生安則道生若起他習乖盡
天理操心平等此卦執我較人之象
凡事恭謙以解習氣


第五十七卦

重澤兌 

黃金氣旺西方 百事可成秋月
蓮華經典緣深 極樂海邊寶筏

純陽解曰 無上福田可獲德穗秋風時節事事
成功願願成就此卦福慧具足之象
來頭功圓必作慈師

第五十八卦

澤水困 

風靜自然浪息 何須決水乾池
車馬紅塵莫躡 此身安太平時
純陽解曰 妄本無根拔則還真切莫驅馳青雲
不如逍遙碧山此卦深戒名利之象
守分安身以終天年

第五十九卦

澤地萃 

麟鳳呈祥聖世 慶雲時節景星
九曜三台迥照 大哉壽福康寧

純陽解曰 致君堯舜位列伊呂士逢此而高顯
切磋琢磨其心此卦真儒出世之象
國家昇平福祿萬年

第六十卦

澤山咸

天地渾圓和氣 大人利見龍田
到處果然吉慶 焚香何必神前

純陽解曰 世值聖君歌頌帝力身兼出宰輔佐
太平氣像同樂此卦物在和氣之象
凡事如如真真浩浩

第六十一卦

水山蹇

一雨連綿十日 廣陵歸客空留
運數皆由自作 靜居切莫多求

純陽解曰 去時雖易回時至難病者行者逢此
支離遷延丁寧此卦滯雨他鄉之象
百事迤窘切勿妄作

第六十二卦

地山謙

名區種桂秋香 清淨仙廬我愛
無非無是無關 蘿月松風自在

純陽解曰 三公之職如屣勸君脫去還山小廬
白雲怡待多時此卦名區清淨之象
身棲斯間以就仙緣

第六十三卦

雷山小過

數椽小屋南窓 一炷心香朝夕
其何羨萬間家 不飽不飢遯跡

純陽解曰 活活潑潑好自在好自在去去來來
任逍遙任逍遙此卦居塵遯世之象
無拘無束誰是誰非

第六十四卦

雷澤歸妹

他鄉雖勝家鄉 回想高堂白髮
彝倫大法丁寧 罔敢或違或越

純陽解曰 百行之源總在孝德心無間於念親
身必登於天上此卦不忘彝倫之象
念茲在茲勿違聖訓

予畢文昌籤譜之解以書之曰夫一切聖人
之為聖人皆悟妙理而成聖成真故其身充
滿天地之間不待祈祝而常現於一切處則

以著以龜叩之以誠則示吉示凶隨心即感者何也凡心聖心心即不二故斯感不間感而感之斯應不間應而應之矣是籤譜之說非但辨之吉凶而已或勸善而懲惡或抑揚而反復或教而修心要訣或示而處世良法以明予與帝君開化之苦心在壇諸士以為珍愛純陽子書於無相壇

兩儀函

集唐籤

第一籤

元命化

世事如花落曉風

薛逢

三千世界本無窮

武元衡

分明記

得還家夢

來鵬

留滯三年在浙東

白居易

第二籤

流形化

書字纔能記姓名

韋蟾

還同白鶴返遼城

施肩吾

誰人得

似張公子

徐凝

身出山河應數生

千方

第三籤

生民化

寶馬琬弓金僕姑歐陽詹往來踪跡遍三吳陸龜蒙傷心

欲問前朝事寶鞏重示瞿塘峽口圖薛濤

第四籤 易俗化

異服殊音不可親劉禹錫百王禮樂頌垂紳包何共來百

越文身地柳宗元日日神君雨露新李頎

第五籤 稽古化

楚鄉卑濕嘆殊方戴叔倫已帶儒冠事素王許渾今日始

知風土異元稹九苞鳳藻闢洪荒李商隱

第六籤 奉真化

滄波四望通千里皇甫冉獨向仙祠拜老君馬戴高寄一

身雲水外羅鄴九天鸞鶴待成羣章孝標

第七籤 寧親化

五柳門前聚晚鴉崔峒靈萱萎去更無花郎士元慇懃莫

怪求醫切皮日休神草延年出道家皮日休

第八籤 幽婚化

一夜霜風凋玉芝劉禹錫祇憑魂夢接親知劉駕與君便

是鴛鴦侶杜甫莫遣佳期更後期李商隱

第九籤 淵石化

桂宮志 卷七 集唐籤 早 天生福

姬姜仁厚啓麟振吳融終日齋心禱玉宸嚴休復聞彼夢
熊猶未兆劉禹錫還隨文伴賽江神于鵠

第十籤馴雉化

墳上俄生碧草煙溫庭筠紙錢那得到黃泉王建浮生聚

散雲相似李羣玉舊日儀容只宛然融

第十一籤迴流化

百尺青崖三尺墳溫庭筠灌河決州何紛紛裴耀卿荒村

古岸誰家在朱放靜夜名香手自焚皇甫冉

第十二籤降瘟化

何事門人廢蓼莪于鵠空聞子夜鬼悲歌李商隱煩君遠

示青囊術盧綸若箇溪邊藥最多張籍

第十三籤好生化

遠岫當軒列翠光伍喬空留仙洞號華陽白居易蓬萊道

士飛霞札李羣玉新授金書八素章曹唐

第十四籤天官化

神農本草自應知崔與宗聖主宣名獎藝奇易重世上仙

方無覓處徐疑就中南土藉良醫羅隱

第十五籤薦賢化

石上菖蒲節節靈王貞白一人理國致昇平包開賢

路荆榛掃劉滄天子曾欽諫議名張籍

第十六籤格非化

玉陛聲來雉尾高耿湋九重春色醉仙桃杜甫囊中封事

賢臣頌崔日用何事螭頭運兔毫孫蜀

第十七籤榮歸化

傾朝共羨寵光頻韓愈堯放巢由作外臣白居易三表自

陳辭北闕張籍東門悵別柳條新劉長卿

第十八籤敦宗化

憶作兒童隨伯氏韓愈家書頻寄兩三封楊凌百年世澤

餘家慶戴叔倫秋摘黃花釀酒濃李商隱

第十九籤歸寂化

幽閣焚香萬慮凝鄭畋六時常奉佛前燈李商隱誰能來

此尋真諦白居易似證禪心入大乘耿湋

第二十籤君山化

為愛君山景最靈高駢兩層危岫拂眉青羅隱水精樓閣

分明見司空圖便欲移家過洞庭李涉

第二十一籤感生化

桂宮志 卷七 集唐籤 望 天柱編

蜀客船從鳥道回

劉禹錫

又看天漢躍龍媒

司空曙

知君

憶得前身事

劉禹錫

喬梓連雲挺異材

崔峒

第二十二籤

奉先化

白髮如絲日日新

李商隱

起居八座太夫人

杜甫

百年壽

母同瞻仰

于武陵

鳳誥鸞章聖善身

孫棨

第二十三籤

孝友化

吾家邁種自虬螭

韋旦

有子皆如玉樹枝

朱慶餘

遙想滿

堂歡笑處

溫子孫

李羣玉

第二十四籤

沔水化

不覺官高怨亦高

汪遵

空攜筆硯奉龍韜

李商隱

再三陳

乞爐煙裏

王建

舊德中朝屬望勞

郭受

第二十五籤

白駒化

知已新提造化權

白居易

問才今是洛陽年

鄭谷

以人事

主資公輔

張說

天網羅才聖主前

林寬

第二十六籤

舉簪化

莫因時俗劇孤稜

張沁

此日賢關慶得朋

李又

卑散自知

霄漢隔

王建

衛廷文子盡同升

李敬元

第二十七籤

恤孤化

顧影庭荒病鶴孤羅隱故交求見一人無元稹中郎有女

能傳業韓愈深愧三縑恤旅途平會

第二十八籤慈訓化

豈意靈萱臥壟煙柳談每逢寒食一凄然趙嘏相思相見

知何日李白泣把山花奠几筵皮日休

第二十九籤盡忠化

愛日羔裘志五紵劉延老憂王室泣銅駝李商隱捧盤小

吏初宣勅張籍門冷兼無雀可羅白居易

第三十籤棲真化

雲似無心水似閒陸龜蒙去年今日侍龍顏杜甫凡情不

到支公地釋皎然一世清涼住雪山李羣玉

第三十一籤山王化

劔閣重關蜀北門李白村中寥落不堪論杜荀鶴留將寶

劔驅金虎崔魯永錫河山裕後昆賈島

第三十二籤刑賞化

朱邸新婚樂事饒韓翃女蘿山鬼語相邀李商隱神明鑑

自環中運胡宿戒律曾持五百條李洞

第三十三籤存褒化

桂宮志 卷七 集唐籤 器

相宮詩 卷十 天柱編

微笑時時出瓠犀權德輿可憐人世隔雲霓李紳陳倉驛

吏驚烽火蘇廣文幾代荒涼繡嶺西談用之

第三十四籤回風化

一片黑雲何處起姚合舊來詩草半燒焚徐寅若傾家釀

招行客劉禹錫報德誰能不顧勲劉長卿

第三十五籤明冤化

露滴幽叢見淚痕李山甫巫咸不下問銜冤李商隱空山

寂寂開新塚劉長卿寂寞何人吊旅魂韋莊

第三十六籤苴邑化

芳蘭慘被嚴霜折劉言史政以回天雨露蘇沈彬叢桂芳

聯依玉樹王渙歌謠聲徹帝王都姚鵠

第三十七籤拯溺化

野流行地沒禾黍顏真卿荒霖障天無蒼雯沈佺期身非

精衛思填海張仲方井邑家家父母君章孝標

第三十八籤雨穀化

空掩柴扉度歲華武元衡耕人訝我久咨嗟鄭谷雨師一

日三回到施肩吾四海於今是一家李商隱

第三十九籤曲雨化

集唐籤 天柱編

碧油幢引向東川

白居易

邑有流亡愧俸錢

韋應物

聞道

旱時求得雨

韓愈

歸來纔及種春田

王維

第四十籤

頌賊化

芙蓉如面柳如眉

白居易

鐵石為心冰雪姿

劉靜修

蛇豕

盡除三首象

姚合

貞心惟有老松知

戎昱

第四十一籤

北郭化

伯道暮年無嗣子

苗發

傷心無語奈愁何

許渾

自從大士

傳心印

裴休

子姓如雲擁玉珂

包佶

第四十二籤

返火化

樂事難逢歲易徂

元稹

近來桃李半燒枯

司空圖

風神為

我掃煙霧

施肩吾

舊族兵侵大半無

羅隱

第四十三籤

平直化

萬里沙西寇已平

張喬

十年衰老愧稱兄

皇甫會

旌旗四

面高秋見

耿湣

長擁千山護蜀城

蕭遇

第四十四籤

費丁化

蜀魂啼處酒初醒

李中

鑿破天荒問五丁

白居易

堪嘆故

君成杜宇

李商隱

此生何處拜儀形

羅隱

第四十五籤

石牛化

圭宮志

卷七

集唐籤

吳

天柱編

行盡青山到益州張籍秦開蜀道置金牛李白五丁驅得

神功盡陸龜蒙事去人亡跡自留劉長卿

第四十六籤五婦化

曉來和淚喪嬋娟韋莊國破君亡不記年裴瑗長路關心

悲劔閣杜甫更無人跡有苔錢韓偓

第四十七籤顯靈化

路遶千巖劔閣斜武元衡力窮難拔蜀山蛇李商隱君看

陌上何人墓杜甫落盡春風第一花許渾

第四十八籤大丹化

卜居幽勝遠塵寰張貴罨畫樓臺青黛山元稹老氏五千

懷寶訓杜牧欲求真訣注衰顏薛能

第四十九籤巴都化

江湖今已戮長鯨于武陵按俗承流幾路清韓翃自是神

明多感應劉山甫此中多恨恨難平羅彌

第五十籤婆娑化

魏舒偏念外家恩李嘉祐公道開時敢說冤黃滔惟有夢

中相近分李商隱鳳雛聯翼美王孫盧綸

第五十一籤戒龍化

圭宮志 卷七 集唐籤 天柱編

把酒相看日又曛韋莊秋濤橫捲半江雲方前朝舊物

東流逝崔塗龍鬪雌雄勢已分常建

第五十二籤鳳山化

雪彩冰姿號女華張貴為言流落在天涯韋莊孤帆細雨

慈烏泣包佶客路秋風旅鴈嗟盧僎

第五十三籤魚腹化

玉腮珠淚灑臨歧崔季衡手把花枝唱竹枝薛逢流落天

涯誰見問韋莊此生何幸有歸期劉長卿

第五十四籤口業化

哭盡傷心淚已枯元稹終憐吉了舌模糊孫繁文章慧辯

皆如此白居易不覺悲同楚大夫羅隱

第五十五籤東郭化

蟠木何材也見知錢起榮枯只在手中移施肩吾不緣眼

痛兼身病鄭谷信是沙吒有盜師崔珏

第五十六籤牛山化

秉蘭佳節客中過王駕川上俄驚逝水波白居易幾處州

人臨水哭陳邴下歸塵世竟如何司空曙

第五十七籤天威化

亭午羲和駐火輪章金釵委地髻推雲李山甫誰能指

破三生夢張祐鵲尾金爐一世焚皮日休

第五十八籤尚義化

原上鵲鴿無伴侶胡宿于今四海尚淹留李商隱池塘草

綠無佳句白居易誰共芳樽話唱酬姚揆

第五十九籤旌隱化

弟子依前學聚螢裴送迎終日在郊坰鄭谷如今世俗

輕前輩劉禹錫辜負宣尼一卷經方愚

第六十籤祐正化

祇有家貧免盜憎陸龜蒙追尋往事倍傷情元稹亂來兒

姪皆分散王駕戮盡鯨鯢漢水清劉禹錫

第六十一籤殺生化

竝蒂蓮花貝葉文王哲一靈衣用戒香薰溫庭筠休公別

久如相問劉禹錫何允明朝不如葷皮日休

第六十二籤酷虐化

喜得君侯妙撫綏張清如水玉直如絲耿花間五馬

時行縣劉長卿縱是蒲鞭也莫施呂溫

第六十三籤惘世化

天上高名世上身羅十年風景在三秦曹卿雲靄靄
輝南極羅我與劉公本是親武元

第六十四籤咸陽

欲朝金闕暫依劉許西入潼關雲樹秋劉四皓有芝

輕漢主杜江山空結古今愁燕

第六十五籤印池

夢裏分明入漢宮王之亦知恩怨到頭空白居易龍翻

浩海波濤壯韋世界興亡落葉風李

第六十六籤解脫

八部同瞻一佛身廣西方社裏舊相親權德輿今來合

掌聽師語雍萬里香花結勝因裴

第六十七籤仁政

周有遺風父老賢談用政成何用滿三年方二天在

頂家家詠黃聲價如今滿日邊方

第六十八籤幽明

澄潭到底不生塵方琴在牀頭錄在身王靜守化條

無一事武元孤衷真可質天神李

第六十九籤籌帷

圭宮志 卷十 集唐籤

手一天柱編

將畧兵機命世雄劉禹錫 一枝長戟六鈞弓羅隱 可憐無

定河邊骨常建 麟閣何人定戰功李益

第七十籤如意化

期君新歲奉恩光楊巨源 畫省清華接建章蘇頲 星使自

天丹詔下盧渥 玉皇新賜邶衣裳陸龜蒙

第七十一籤丁未化

薄宦相榮若網牽盧綸 雲門天竺舊因緣李涉 武林花木

應常在李端 記得初騎竹馬年韋莊

第七十二籤水漕化

臺榭參差積翠間薛逢 仙舟何處水潺潺杜牧 頓蘇萬物

焦枯意白居易 血食如今配此山劉禹錫

第七十三籤桂籍化

偏將彩筆冠羣倫鄭谷 金榜高懸姓字真袁皓 南國秀才

爭汲引紀唐夫 九流人物待陶甄薛逢

第七十四籤孝廉化

斗極司權著祖鞭項斯 窮波猶認孝廉船張賁 鸚鴻得路

爭先翥武元衡 正籍虛公網俊賢于鵠

第七十五籤感時化

故人相去隔雲泥顧况纔喜中原息鼓鞞司空圖下馬政

成無一事方干玉壺春酒正堪攜岑參

第七十六籤神扶化

使節新聲著虎關薛能令公早已臥東山劉憲謝家池館

花籠月王之渙因想興亡自慘顏羅鄴

第七十七籤誅暴化

膏以明煎信矣哉李涉野風吹起紙錢灰吳融人間歲月

如流水蕭徹莫遣黃金漫作堆張祐

第七十八籤明經化

石門蘿徑與天鄰鄭谷獨任斯文擔不分孫光憲自是尼

山真道脉林滋青箱世業著河汾王初

第七十九籤護聖化

三世勤王國史稱李商隱立朝孤節自稜稜芮挺章莫誇

十萬兵威盛司空圖風度何人似九齡吳融

第八十籤明威化

何處春風種蕙蘭劉商公車待詔赴長安皇甫冉誰知二

十餘年後張籍桂在蟾宮不可攀盧肇

第八十一籤濟順化

百戰山河血未消歐陽元不堪人事日蕭條杜甫天涯靜

處無爭戰王昌齡南北與圖總屬堯韋夷中

第八十二籤濟述化

數片荷衣不滿身秦系詩書空被市兒嗔劉威七盤九折

難行處陸暢風雨林中有鬼神蘇廣文

第八十三籤證果化

江湖天闊足風濤郭受蓮葉舟輕自學摻郭受盡道陰功

能濟物司空圖逝波今日去滔滔裴休

第八十四籤明良化

紫詔徵賢發帝聰章碣捧持堯日慶雲中王建救時相業

商霖賜韋莊變理陰陽禾黍豐元稹

第八十五籤忠顯化

更值干戈亂起時林寬夜來飛箭滿罽毼皮日休孤山幾

處看烽火蓋運一劔會當百萬師王維

第八十六籤聖治化

兩朝盛際繼虞唐唐彥謙詞客新開白玉堂胡宿誰是後

來修史者鄭雲叟聲名早註御屏傍李鄴

第八十七籤武烈化

圭宮志 卷七 集唐籤

兩川消息未休兵鄭谷白挺猶驅婦女行羅隱今日兵符

歸上將李涉劍橫天外八風清談用之

第八十八籤與國化

亂餘山水半凋殘戴叔倫草殞荒山白骨寒韓愈清廟萬

年長血食李紳錦袍輝映日輪丹李益

第八十九籤止足化

帝書徵出白雲鄉曹唐功業汾陽異姓王杜甫金錄漸加

新品秩陸龜蒙衣冠身惹御爐香賈至

第九十籤真元化

玉清壇上著霓衣劉禹錫夕捧天書拜紫微王維運會風

雲初際泰陳陶文昌新入有光輝白居易

第九十一籤誅逆化

手披荒草看孤墳劉長卿玉樹埋深哭不聞李白畢竟百

年同是夢元稹銘旌官爵等浮雲白居易

第九十二籤拔苦化

軺車銜命奉恩輝司空曙幢節飄空紫鳳飛王昌齡帝錫

蟠花輝黼黻許彬著書精義入玄微劉滄

第九十三籤福瀘化

思結空門香火緣白居易一觀如幻自忘筌苑咸不知禍

起蕭牆內胡曾數到如今四十年朱慶餘

第九十四籤昭明化

白石溪邊自結廬曹唐韋編歲月紀黃初羅隱雲煙落紙

晶光迸杜甫紫鳳朝銜五色書司空曙

第九十五籤亨屯化

年來惆悵與誰論韓偓上帝深居閉九閣李商隱山作劒

攢江瀉鏡韓愈成都別是一乾坤胡曾

第九十六籤安南化

蓬萊宮闕壓雲鰲王建鸞殿分階翊彩旌耿湓聞道蜀江

風景好李博文昌二十四仙曹韋莊

第九十七籤復古化

不見爐峰二十年齊己錦城歸路草芊芊劉兼西川舊是

經行地溫庭筠共聽先生講太玄陸龜蒙

桂宮誌卷之八目錄

天柱編

普應函

玉真靈蹟紀

輔相函

天聾地啞

勇義侯

朱衣

左右二仙官

桂宮言
卷八

天在

如意

白驢

瑤冊函

文帝誥

聖眷誥

聖誕考

聖位考

詔彙

歷代封爵

附
祀典

文壽函

遺蹟

附
墓宮

桂宮志

卷八

目錄

二

天在

桂宮誌卷之八天在編

安南徐 珽彙輯

鷄林李培根校訂

普應函

玉真靈蹟記

七曲授杖

後秦姚萇與帝君有夙契帝君嘗至長安見萇謂曰
別後九年君當入蜀梓潼七曲山頭有叢林僕所居
也叩樹必有應者幸為見尋後苻堅命萇入蜀因至

七曲山訪得其處舉策叩樹有闍人出曰此帝君仙室也萇曰帝君可得見乎入白有頃數吏前導見堂宇壯麗侍御擁帝君出敘舊設席張樂酒酣帝君曰君蚤還秦秦無主其在君乎萇辭帝君勅左右授以一杖曰有兵革事所指如意萇得之戰無不克及苻堅死果據秦稱帝卽其地立帝君廟祀之

萬里衛鑾

唐天寶漁陽之亂玄宗幸蜀帝君化爲儒生謁帝於萬里橋帝曰卿非北郭張生乎生曰然臣密衛鑾與至此後帝還都追封左丞相

削李登印

唐李登者年十八爲鄉貢首自後凡十年一薦名愈下年幾五十不第一日齋沐詣葉靜法師具告曰登自十八歲叨冒鄉薦凡經四舉不登一第何罪至此幸法師入冥爲登勘當此生如何法師諾之曰蜀之梓潼有神掌文昌職貢舉司祿之官必能知之吾當爲汝叩之一日上章道過治所謁帝君曰士人李登者某年某月某日某時生凡四舉不第此人果何如

帝命一吏示籍對曰李登初生時賜玉印十八歲鄉薦十九作狀元五十三位至右相緣得舉後窺隣女燕娘事雖不諧而繫其父張澄於獄以此罪展十年降二甲二十八歲得舉後侵兄李豐屋基而奪之至形於訟以此又展十年降三甲三十八歲得舉後長安邸中淫一良人婦鄭氏而成其夫白元之罪又展十年降第四甲四十八歲得舉後盜隣居王驥家室女慶娘爲惡不悛已削去籍矣終身不第法師辭退以是告登登無以對一夕愧恨而死後之士人可

不戒哉又詩曰影響昭昭理可尋性天豈與物交侵眼根所着無非色身業居多莫犯淫四舉不沾天子祿一生虛負狀元心李登狂忘終除籍果報徒嗟罪障深

雨羅密穀

蜀西大荒饑死甚衆富民羅密閉糶義士許容竭產賑貧來者無窮力不能繼終夜炷香祈天請祐帝君乃奏上帝有旨取羅所畜之穀凡五千斛雨之乃勅諭風師發其屋穀隨風旋自空而雨各以色聚徧于

郊衢一邑之人無不飽飫羅之畜藏一日而盡邑人感許之惠往往酬還幸羅之灾從以稱快蜀帝以容為邑佐密聞之自縊

現火導樵

進士孫樵過帝君祠夜黑雨滑樵祈帝君指道禱畢忽現火光如晝得歸後樵歸秦行及山足猛雨如雹樵復訴曰帝君能神返雨為晴俄而四山開霽樵感而為文以祭奉禮益虔

奉驢護駕

黃巢陷華州僖宗夜遁巢遣朱溫追僖宗馬斃幾為賊及帝君以自乘白驢奉僖宗擁衛至劍南僖宗幸帝君祠祀以太牢解佩劍為贈封濟順王祈助討巢巢果伏誅崇祀益虔

壁裂出神

晉王李克用母禱於應州文昌祠忽壁裂金甲神躍出遂生克用

籤抽逾天

蜀主王衍自統精兵入秦州以巡邊為名羣臣切諫

皆不聽衍親禱于帝君廟抽籤得逾天者殃四字不悅行至緜谷而唐師入境衍懼遽還兵敗降於唐

虔禱生軾

眉山蘇公仲力行陰騭文蜀地大荒捐膏腴產三千畝濟活饑民無算乃生子洵一日洵遊玉局觀得張仙像每朝虔禱四年生子軾又二年生子轍仙卽帝君也帝君本應張宿故化生多姓張云

大呼滅均

宋真宗咸平三年益州王均叛招安使雷有終進討

祈于帝君廟夢帝君曰我遣神兵助汝破賊忽有人登衝梯指賊大呼曰梓潼帝君遣我來九月二十日城陷爾輩悉當夷滅賊射之倏不見及期果克城有終以聞詔改封英顯王號修飾祠宇仍令少府造衣服法物祭器奉安焉

徐賦象物

西蜀有二舉人同硯席旣得舉貧甚干索旁郡以辦行將迫歲始離鄉里懼引保後時窮日夜以行至劍門帝君廟已昏晚大風雪苦寒不可夜行遂禱于帝

各占其得失且祈夢爲信草草就廟廡下席地而寢入夜風雪轉甚忽見廟中燈燭如晝殺俎甚盛人物紛然往來俄傳導自遠而至聲振四山皆岳瀆貴神也旣就席賓主勸酬如世人二子大懼已無可奈何潛起伏暗處觀焉酒行忽一神曰帝命吾儕作來歲狀元賦當議題一神曰以鑄鼎象物爲題旣而諸神皆一韻且各刪潤雕改商確又久之遂畢朗然誦之曰當召作狀元者魂魄授之二子默喜私相謂曰此正爲吾二人發迨將曉見神各起致別傳呼出廟而

去視廟中寂然如故二子素聰警各盡記其賦亟寫於書帙後無一字忘相與拜賜鼓舞而去倍道而行笑語欣然惟恐富貴之逼身也至京適將引保就試過省益志氣洋洋半驗矣至御試二子坐東西廊御題出果鑄鼎象物賦韻脚盡同東廊者下筆思廟中所書懵然一字不能上口間關過西廊問之西廊者望見東來者曰御題驗矣我乃不能記欲起問子幸無隱也東廊者曰我正欲問子也於是二人交相怒曰臨利害之際乃見平生且此神賜而獨私以自用

天其福爾耶各憤怒不得意草草信筆而出及唱名二子皆被黜狀元乃徐爽也既見印賣賦二子比廟中所記者無一字異也二子歎息始悟凡得失皆有假手者遂皆罷筆入山不復事筆硯

何策問道

梓州臨潼有帝君祠素號靈異士大夫過之得風雨送必至宰相進士過之得風雨則必殿魁自古傳無一失何文縝丞相稟政和初當計偕亦得風雨送欲入謁而忘之翌日行十餘里始悟亟下馬還望默禱

而拜是夕夢入神廷帝君在簾中以誥投簾外文縝發視畧如今之誥亦有詞文縝猶能成誦畧記有云朕臨軒策士今汝衰然為舉首聖策所問道也文縝抵闕下適得太上注道德經因日夜窮治及試策日果問道而何為殿魁

夢織改石

李知幾資州人少時祈夢於梓潼帝君是夕夢至成都天寧觀有道士指織女支機石曰以是為名字則及第矣遂改名石字知幾是歲果第

誦杜對峽

宋孝宗時辭朝法甚嚴雖蜀人守蜀郡不遠萬里來見有蜀守當朝辭素不能文以為憂其家素事帝君夜夢帝君謂之曰兩邊山木合終日子規啼會朝對上問卿從峽中來乎風景如何守即用前兩語對上首肯再三翌日謂宰相趙雄曰昨有蜀守入對者朕問峽中風景彼誦杜詩以對三峽之景宛在目可謂善言詩也可與寺丞雄退朝問守何以能爾守不敢隱雄曰吾固疑君不能及此若留中上再問敗矣

不若歸蜀赴郡乃予憲節使

晝見平亂

光宗紹熙中瀘卒張信作亂殺守帥張孝芳帝君當正晝見于閱武堂信黨恇憤同伍張昌因擊殺信瀘遂平

夕夢得吉

真西山未第時將會試於行在道括蒼約友人鄭達道同祈夢於帝君廟下入謁於帝君遂擊其鼓題詩於上曰大叩則大應小叩則小鳴我來一叩動天地

五湖四海聞其聲是夕得吉夢其年果中

逾謀騎虎

寧宗開禧三年正月蜀將吳曦叛歸虜授冊卽蜀王位二月隨軍轉運安丙奉密詔梟曦於興州曦前事之數月神思昏擾夜數躍起寢中叱咤四顧或終夕不得寢意頗悔其弟睨力憊憊之曰是謂騎虎顧可中道下耶曦家素事帝君自玠字晉璘玠弟字唐卿以來事必禱有驗乃齋而請是夕夢帝坐堂上已被赭玉謁焉因告以逾且祈卜年之修永帝不答第曰蜀土

已悉安丙矣既寤大喜謂事必遂時安以隨軍潛在魚關驛召以歸命以爰立安顧逾謀堅決觸之且與俱靡惟徐圖可以得志不得已諾之猶辭相印遂以丞相長史權知都省事授之居數月而成獲嘉之績

妄念易妻

宋時有士人事帝君最靈屢夢許之及第省闈戰北再扣於帝君復夢曰吾報汝無不的而某年月日汝於某處所言何事今祿籍削盡敢望第耶士大悔過又曰已奏上帝夫復何言蓋赴春官時自謂若登顯

要而妻醜且賤思有以處之嗚呼念可妄起乎

岳李稱身

宋時有岳生李生各祈夢於七曲山梓潼祠祈功名夢中果俱至帝君前忽一人下殿傳曰汝二人皆可貴但身與頭不相稱因引至廊下用斧兩易其頭歸見妻子皆駭然及問平日家事應對皆無舛乃稍安後二人皆登科

州漕非官

蜀人崔福子寓居福建三世仕宦父仕至郡守福子

以蔭至承務郎某處幹官而遊蕩喜賭博嘉熙年間父怒逐之宿里中廟中夜聞報曰梓潼帝君至廟神出肅帝君中座言語應對皆不可曉久之或曰何有生氣廟神曰里中崔某帝君曰啞福子欲知前程事至前下拜曰帝君掌人間功名事某三世仕宦皆監司郡守未知某前程所到如何帝君曰爾家富貴皆爾高祖一人所積耳曾祖以下三世當秉勻軸而既已富貴率皆驕淫貪暴故不復顯今爾亦止可一任已福子曰某二子如何帝君曰長子可作州次子可

作漕皆在四十年後福子喜廟神曰君何事至此福子告以故神曰君父雖相逐君母正相念君幸急歸毋貽母憂福子出廟回顧則寂然無睹矣遂歸其母正號泣秉燭遍索三年福子死悟神言止一任者三年也至元江南歸附後長子遇兵三刀而死蓋三刀爲州字也次子溺曹水乃漕字也

夢文昌星

呂思誠字仲實平定州人父允終平度知州致仕母馮氏夢一丈夫烏巾白襪衫紅鞵束帶趨而揖曰我

文昌星也乃寤思誠生日有神光見者異之後官至光祿大夫司農以勁拔聞卒諡忠肅

誦大洞經

蜀人姚文起性好善事母孝年過五十而嗣未立居武昌而遊仕婺州值帝君垂訓云汝但誦大洞經而後嗣可期後文起誦至千卷次年生一男名文昌保豈非至孝之應乎

鼉鼓逢逢

趙堯臨江府人邑有文昌閣在文廟東偏水濱傳爲

葉教授所創奉帝君像諸生赴試祈夢於此壩於至正甲申夢經府樓前有老人擊鼓及試題乃鼉鼓逢逢矇叟奏公果中選

太素冉冉

宋元之際有歐陽生者名器虛閩郡人善鍊氣出神居青華道院值仲春上丁縣大夫祀宣聖生出神往觀時文廟庭燎輝煌俎豆具陳樂舞並作冠裳序立忽有一人絳袍玉簡由靈星左門入歷東廡而上周匝大成殿廷轉西廡而下由靈星右門出生進問之

其人曰我文昌君也宣聖命我來察人誠否言訖步虛而去良久主祭官陞殿祭酒讀祝時一道太素之氣皎若匹練自天而垂貫入殿廷祭畢冉冉復收而上

丁梓雋異

丁梓人者武岡州人其父嘗夜夢見帝君遂能雕塑帝像極工緻梓人因其父藝以梓人名之有雋才多異術洪武乙丑進士歷知登州府

周吉恂懦

太原忻州諸生王用予爲人厚重簡默與里中結文昌社每歲元日輪建壇醮祈祀於文昌行宮同社俞麟以孝謹稱郁從周姿容俊偉下筆千言立就里中屈指二子正統辛酉歲朝用予先期齋戒赴行宮宿甫就枕有促之者曰起起帝君升殿矣用予隨出殿外列炬燭天帝君端坐其上進見神祇彷彿十數人肅拜丹墀時一朝冠絳服之神抱大冊十數卷用予問何冊答曰各省鄉試榜因各省城隍等神彙報已完造送帝君書押用予因問本省榜中有王用予否

曰無有俞麟郁從周否曰無有頃絳服者捧冊跪陳几前用予竊視帝君子冊中本名下輒書一押亦有躊躇不下筆者聞呼絳服發冊大聲云仍付各省城隍速查陰德之家仁厚之子報名以換各榜未押者已而聞殿內呼王用予入見用予匍匐階下帝君曰功名事未可輕洩因汝至誠故召汝析之汝家祖父皆樸謹業註爾爲上榜鄉科彰傳家忠厚之報因汝半生遇神佛輒求功名如意願妻楊氏病痊白頭相保孀母在堂並未祈祐一語以此獲罪天曹降爾兩

科爾名在下榜五十三名慎重自愛毋更觸天心也
用予謝罪不已帝君又云爾同里周吉爲今科本省
榜首時社中吉最恂懦文復不逮諸人因請中元之
故帝君曰周吉父祖俱爲士從未一字入公門兼淫
一婦女相沿三代並未形人一短暴人一惡且其祖
曾作百忍說以訓人讀而馴服者頗衆故其父子祖
孫以簡靜基福者六十餘年此係最上隱德人皆不
知上帝克嘉註昌三代今吉發元特爲福澤之肇端
耳用予復叩首云同社俞麟郁從周末審發科第否

帝君顧掌文卷童子命查太原士冊檢閱時色若不
懌云俞麟應得一科因事親用腹誹法且谿刻論人
而僞以君子長者自命故黜其科使其窮年潦倒諸
生間用予請問何謂腹誹帝君曰彼於父母凡語言
舉動麟心輒不謂然但勉強不露聲色浮沉順之是
視親如路人矣假行竊名最撓神怒故爾罰之至郁
從周生昇異才位至少保綠其十七歲爲諸生後恃
才凌物諧謔譏彈冥中錄其輕薄口過已滿二千四
百七十餘條上帝震怒命註於陰惡籍中悉除所有

倘老大猶不知悔過溢三千條浸將奪其壽算矣浸將錄其子孫入丐籍矣傷天地之和犯鬼神之忌莫此爲甚故罪與殺生邪淫等帝君又諭云淫殺口過絲粟有報各人受之不待言矣至於口頭訕謗隨意譏彈誅隱賊心習焉不察究至言貌心胷盡成輕薄鬼神悉記凶惡相隨向來福澤胎元頓易爲貧窮軀殼汝當廣勸世人鑑茲爲戒乃再拜而寤秋榜開果周吉爲首也

夢星誕貴

殷士儋字正甫母郭氏七舉子不就夢文昌星見已而誕公一歲卽能言嘉靖丁未進士官至少保

出囚奪祿

楊春芳字子含嘉靖庚子舉人選巴東令性剛直縣廨奉梓潼帝君郡節推某過之帝君見夢於春芳曰某此行受賄四百出死囚某天曹奪其祿矣密詢之果然嘗稱說以爲世戒

三旗插號

浙江貢生湛某赴舉南都有老奴魂遊場中醒言所

見無非鬼神明遠樓綠袍按籍而坐者貌類梓潼又說日西鼓動內院發出三色小旗插於號房簷角解頭黃旗餘舉子悉派紅旗其不中式者皆青旗

一丸起疾

李世傑應魁一日得疾月餘不解羣醫皆以必不可起矣夜夢帝君授藥一丸促令食之覺後似少愈焉明日醫視脈症卽曰可救矣旬日而痊

降墜有兆

張元忬字子蓋山陰人隆慶辛未狀元官至太子左

諭德其初族中夢文昌降而君生其後越中長吏夢

文昌墜而君歿

爭逐不得

胡應麟乙未春試前一夕夢帝君坐殿上召應麟入試旣入則先有一人在坐者呼之曰易水生未幾殿上飛下試目一紙視之有晉元帝恭默思道七字翻飛不定應麟與易水生爭逐之竟爲彼先得應麟怒力往鬪擊而覺爲不怡者久之及入會場第一題是司馬牛問仁章始悟所謂晉元帝者晉姓司馬元帝

是牛金所生以一姓合爲司馬牛也恭默思道是認
言破其意耳可謂大巧第易水生不解所謂及揭榜
則湯賓尹第一蓋以易水二字爲湯也

士奇中題

鄧國材號柱瀾廣西橫州人萬歷二十三年任衡山
建文昌書院新成卽擇吉以說之不以道三句題課
諸士旋爲評閱夜分乃罷後其子鄧士奇竟以是題
中廣西第一

節推削秩

荊州魏節推名釗廣東人嘗往夷陵驗屍道經某鎮
鎮人徐少卿名宗素奉帝君極靈應夢帝君告曰明
日魏銓部過此勿忽少卿信而伺之止得節推魏姓
者疑其是也厚與結納而去數日復夢帝君告曰前
魏姓官受賄四百金故出殺人者之罪其被殺者冤
訴上帝已削所有爵秩矣少卿踪跡其事果如夢言
魏尋以憂去復補濟南陞戶部主事歿於京師

棺懸驗陶

華亭陶孝廉恂字冰修有文名六上公車自以懷才

被抑感憤不平京城有文昌祠祈夢最靈一夕齋沐
往禱仰見天上懸一棺欲墜未墜驚寤不樂者久之
復自解曰夢棺得官予庶幾入彀乎及榜發仍下第
謁選得天台廣文不半年卒於任乃悟天為天台棺
為蓋棺之兆夢之巧驗如此

雷擊走藍

正統癸酉夏蜀寇藍那作亂都御史彭澤討之祈於
帝君帝君降筆作詩示攻取方畧并破賊期初寇亦
祈帝君帝君不答舉火焚祠之桂香樓忽大雷電雨
雹擊之走尋滅如降筆所期

凡生靈芝

明王文恪公鏊申文定公時行虔奉帝訓身體力行
文恪公中會元帝君現於闈中文定公中狀元靈芝
生於几上二公文章相業卓越千古子孫科甲綿延
不絕

袖出紫玉

顧侍御夢鯉號禹門崑山人為諸生時虔事文昌力
行寶訓夢帝君日子名在一六題乃儀封人請見覺

而不解其意萬歷甲戌科闈中卷與孫月峰並擬元
填榜時始置第六謁選得河南儀封縣循績報最擢
御史曾孫名丁璫字湘佩康熙丙午應試秋闈夢謁
帝君帝君袖出一方紫玉曰與汝丁璫受而懷之又
出一玉如前又受而懷之榜發果領薦丙辰成進士
今以陰騭文每句作一頌有刻本行世

如石夢帝

遂寧李實字如石少時一夕夢立青草塢中見堂上
文昌帝君簷邊拱立若有候者俄而關帝至賓主揖
畢關帝指謂文昌曰者秀才也肯學好文昌舉手曰
已將他姓名註就崇禎癸未進士選長洲縣令甲申
後罷官居吳人比之陶靖節云

尚玄感斗

陳真人某號尚玄子少為掾吏旋辭歸學道終身不
娶虔禮文昌斗懺刊書行世嘗感斗降遂行僊術父
母止其禮拜真人於一夕招二鶴從琉璃燈內飛出
旋繞斗壇久之仍入琉璃不見家人始異之踰四十
歲端坐而逝兩鼻孔流玉柱數寸

吳夢諭楊

楊仲清字田叔錢塘人里有吳某一夕夢修髯冠帶者至囑曰吾欲居邠流楊子家及朝有人載廢銅求售於仲清中有梓潼帝君小像憶吳夢不爽纖毫大詫乃酬以貲裝像奉祠之

崔芽誕陸

陸培字鯤庭崇禎庚辰進士官行人爲文學時卜精舍孤山側夜夢梓潼帝君來言汝是河南崔氏以培護生芽故誕汝陸家名在月中久矣君可自愛後於

鼎革時死節

讓吉報貴

蒲州東門外有兩阜蜿蜒形家相傳以爲貴地楊襄敏公博爲吏部尙書時命堪輿擇吉壤得此地以告公曰此關闔郡文章科第我曷爲私之卽於其地建文昌祠人皆服公厚德不可及後公長子俊民官至戶部尙書第四子俊卿官錦衣衛三子皆監司俊卿子元祥元祥子世芳皆詹翰世以爲厚德之報云

貼經辟疫

蜀明時舉玉珍之後爲廬陵令值疫大作明刻一條
上寫玉清文昌大洞仙經鈴以道士硃印貼門壁間
病者卽愈未病者不染咸異之間於明明曰文昌帝
君父母皆死於疫及得道乃治疫鬼鬼名元伯伏罪
曰下方人有罪孽上帝命閻王與元伯等奉行請毋
滅我但有經號在門卽不敢入已入卽出故貼之可
以辟疫

樓建望龍

何經四明人號醉六順治丙戌以學諭蒞止臨海縣

時值鼎革之初泮宮鞠爲茂草見帝君像在荆棘間
慨然捐俸於啓聖祠址建樓以祀望龍顧山邇在几
席遂以望龍名樓越歲戊子當賓興經夢帝君授隱
語旣寤占數六壬得作賓之兆應在四雋秋闈果如
占入選

亭見天涯

番禺黎方潞字台允甲午省試謁帝君於桂香宮而
占焉得蕭然流落在天涯之句意甚快悒及榜發有
名竊謂神語無驗比下第歸道經山東行李悉爲賊

掠蕭然一身又十餘年得廉州府欽州學正入境仰首忽見天涯亭暗憶前占始知數皆預定中心益懷隱憂未幾尚藩謀叛以從逆失職流落而終

白石納心

董威寶平生虔事帝君以哭弟病甚諸醫束手仲冬之夜夢至一宮觀帝君素袍青巾白鬚飄揚倚檻獨立亟前拜之并訴痛苦狀祈救援帝君曰汝心已偏念汝年少兼多善念袖中出一白石子示之曰此卽汝心也解衣剖胷以指納入良久曰心已無恙奈臟腑俱病何復以手探入腹中撫摩再四口作呻吟而醒自後漸愈

絳玉現像

武林龔璋字爾茂於順治十一年甲午五月初旬家居曝書內見一紙乃帝君陰騭文也言言金玉字字著龜遂發願刻施刻成供於堂上是夜室人郭氏臨產惡血衝嘔命已垂危至四鼓忽假寐夢帝君臨軒端坐側侍二童隨鶴百餘前後圍繞見一鶴向屋啣污穢而去帝君歷層雲逍遙而上醒卽安泰如初繼

而璋姪佳蔚姪媳徐氏臨產雙生辰時生一子至酉時其一子尚在腹中母子一絲弱息驚惶無措佳蔚祈於帝君願施陰騭文萬張叩畢卽分娩母子俱安璋向患眼疾風淚作楚數年來昏眊不明庚子二月望前齋戒三日虔禱帝君次日忽然光明風淚頓除璋又患痔有年坐立痛楚默禱帝君求除痼疾禱畢忽然抖戰腹內如水不一飯間痼疾永除庚子二月璋僕龔賢傷寒四十日而轉痢病已危璋禱於帝君願施陰騭文萬張求其痊可方禱之日僕遂沉睡次

早卽食粥漸愈逾八載復病將危璋急誦帝君本願經一卷誦畢僕病卽痊璋姪佳穎姪媳李氏患痞疾二十年腹內成形每發痛苦欲絕穎虔禱帝君前立願刊施陰騭文二萬張李氏久病一朝消除又於康熙三年十二月初八日璋妻郭氏病亡合家環泣璋向帝君虔誦本願經并陰騭文各一遍哀求經內一神速至閻君處求釋至二鼓氏遂醒問其故云有青衣使者票拘氏行隨至五里外見一仙長執拂追至令我與使者同回使者恐悞限不便仙長云氏不可

去出一陰騭文示之使者見文自去氏得復生又僕人華福年七十有二病痰喘精力日消二月初三日祝帝君聖誕璋喚福祈禱早晚供侍香燭福病次日卽愈今八十餘精力強健又璋於堂上惟供陰騭文朝夕瞻禮思得帝君聖像苦無名筆至都門聞有寧波朱瓚名甚盛寓友人劉君菴家璋備資往求瓚因事冗延擱兩月忽抱恙命危呼吸君菴言其狀璋云不速繕帝君故至此虔誠速繕可立愈瓚時不能起默想聖像稿方成病患立解至今聖像莊嚴尤極靈

驗璋自順治十一年至康熙四年每年印施陰騭文徧行諸省數已十萬張又勸諸善士刊施或一萬或二萬數年內共計有二百餘萬於康熙元年廳前印文處晝見帝君聖像絳袍玉帶積誠感通非僅夢寐通靈也又璋在都門日久廳前有丁香大樹二株右一株因宴客拴馬樹皮四圍剝盡枯死已經一載璋誦帝君本願經有云一應草木承此經者已枯使榮轉更茂盛等語誦不十日樹果復榮又有親王仲者於康熙元年陞安順府知府別時惠璋花木數株北

地寒有石榴一株已斃全無生意至五月十五日令移至中堂囑曰汝雖枯而本體尚存當聽我誦本願經因設香案誠心誦之不半月其樹復生觀於此則帝君之靈驗又非特禍福斯人已也

候補復任

常進士大忠太原人候選在都前一夜夢帝君投刺拔籤得梓潼令奇之後丁艱歸服闋候補又夢如前默思豈復任梓潼乎已而果然

合中見出

康熙甲辰會試有四川舉人楊某場畢候榜與同年飲偶出仆地移時始甦叩之云甫出戶有二卒引至一公府中坐王者南向文昌帝君坐其旁頃之吏引其父母至王者問曰今年汝子合中進士汝願之乎其父拜謝母獨曰不願也王者叩其故母曰此子不孝昔避寇入山令其暫歸視家室適郡檄催謁選遂赴都中途稱疾返而吾死至今飲憾故不願也帝君顧吏檢簿語王者曰以高某代之可也及榜發則高宗礪中式而楊見黜

親揀破損

順天宛平人謝紹銓年四十乏嗣順治己亥冬發心刊施陰騭文萬張龔璋勸其放債毋取厚利通人緩急而量取之謝欣然聽從先年其妻患弱病屢孕不育至是病痊與妾各生一子生子之後復又刻施紙有破損不及檢去一友往平谷縣作幕付文二百張到縣普勸是夜謝夢持文至平谷見帝君從幕出問持何物呈陰騭文帝君揀出破損者謝遂驚醒方知印用損紙卽爲不敬

特允純篤

會稽錢志遠自幼崇信帝君晨夕禮拜不輟其母王氏體弱多病志遠至心虔禱許施陰騭文萬張保延母壽一夕夢帝君竚立雲中呼之上謂曰爾之孝心純篤故特允爾所請自此母病遂愈享年八十有一

馬嶺退虎

維揚人華時芳在都門因公務往山西有御史梁熙刊施陰騭文數萬張途次廣布因芳往晉亦授百張芳行至潞安府老馬嶺忽遇一虎進退兩難芳在嶺

望空叩禱於帝君願施陰騭文五千張俄頃虎退去
得免難

銀屋免火

錢塘陳正文住杭州官巷口因在京候考知帝君報
應諸善事遂於帝前立願力行陰騭文是夜夢見帝
語云汝既立心行善今將汝屋宇俱改換矣及視之
屋宇如銀錫裝成不兩月接家信云官巷口千餘家
俱遭回祿惟陳屋數間不燬

諭青衣回

兵部主事馮標於康熙二年五月十四日傷寒病危
諸醫束手伊姪宏道泣禱於帝君前願施陰騭文萬
張是夜夢帝君至環繞三匝撫其背而言曰汝病即
愈汝前程尚遠即諭青衣使卒數起令回勿爲病祟
醒來病日輕半月全愈

遣天醫治

吳郡彭太史定求字凝祉舉家敬事帝君彭子方爲
孝廉下第家居抱羸疾中夜禮斗偶設一壇杜真君
降乩曰吾爲文昌宮右局大夫號長春子前生杜氏

名喬林字君遷江南華亭人也明萬歷丙辰進士官
浙江布政使茲奉帝君命以彭子讀書有孝行不幸
有疾特遣天醫治之且天榜預注不久當膺人鏡芙
蓉之日時聞者驚為悠謬不經之談而彭子篤信獨
深居無何彭子體中震撼若改易骨節者宿疴頓愈
至丙辰果掄大魁一如真君言嗣是朝夕臨壇帝君
降乩有訓文三篇心懺一部即虔刻印施夙夜敬禮
益凜帝訓不爽

開自新路

四川成都府周士廉善士也向刻感應篇陰騭文施
送遠近忽一日送至某家途遇青衣二人拘至冥府
見門上有東嶽宮三字殿中巍坐三聖檢閱冊籍廉
詢執事云中坐者東嶽聖帝左為雲麾使右為糾察
司俄報梓潼帝君入府三聖相延上坐交接之餘詢
帝君何事降臨帝君曰上帝憫下方衆生好惡不已
爰降玉旨煩聖帝轉行各府城隍檢造冊籍大者乃
兵小者瘟疫曾有之乎聖帝曰然冊籍具在可考而
知也帝君曰我體上帝好生之心欲擇善士布告天

下開以自新之路聖帝曰善人難寄託更難帝君曰天下爲善者不少卽成都而論周士廉非耶糾察司云士廉壽數已終業拘到案帝君請加壽一紀使廉宣揚此意以免天下死亾之苦于是呼士廉入殿諭以前言士廉恐無人信從請明驗以質天下帝君曰有不信者以本年十二月刀兵爲驗時康熙十二年正月十二日也二青衣送士廉出府至一高山云下卽汝家士廉一躍而甦卽以此事刊告秦晉間彼都人士皆驚信而從之

勸延年術

康熙十二年癸丑夏日當湖倪象鴻曹昶張培曹澐金協廣曹志周曹洪重梓文昌帝君報應錄甫成適有張子英者一子三歲出痘十三朝尙無漿諸醫無策乃延羌希文請仙仙示以一方服之痘果起然因膚薄大半皆破又請仙仙又示以末藥外敷且云此子今番無恙但須有延年之術近有倪子等所刻文昌帝君報應錄印施三百本普勸廣行陰隲則壽可永矣

丁祈壽兒

丁同義年四旬得一子名壽兒偶患痰疾十餘日昏迷不醒遂往帝君前虔禱願行陰騭文是夜妻范氏夢一神峩冠博帶入中堂危坐儼如帝君像氏即焚香叩拜祈求壽兒病痊拜畢帝君駕雲而去是日壽兒病即痊

顏受桂籍

顏章敬字生愉平日一心敬事帝君康熙丁巳秋夢帝君授書一冊額曰丹桂籍開視之乃陰騭文也復

聞空中咏詩一絕末有秋高桂子和天香之句醒甚異之因即於藏書處檢其六世祖廷表公暨乃考雲麓公所輯文昌帝君陰騭文註案而叅訂廣益之發心刊布力有未能至戊午十二月十七日次男秉衡名光斗發熱出汗至十九日痘現忽隱反關氣喘身發青斑昏迷不醒名醫束手無策章敬虔禱於帝君前願先刊施陰騭文并奉行靈驗記五百卷求帝君轉死回生至二鼓時分男昏迷頓醒目見朱衣神拂其體復發熱出汗天明痘發斑消更覺稀朗安然無

恙已未秋章敬偶於府治前見有帝君聖像一尊左右足俱剝落欲請歸裝彩一時苦無香資中止及歸家人前不及言隔一月妻胡氏忽病寒熱醫藥不愈其夜夢見家中供一帝君像下體不全裝左足脫去右裝右足脫去左須臾見帝君自從座中出拂其位而坐之法相莊嚴無比醒告章敬聳然想及前像卽往請歸妻病霍然至今莊嚴靈感無似庚申章敬妻胡氏抱病經年神力衰倦又於冬月臨產艱難之甚奄奄弱息勢不可保章敬虔禱於帝君仰祈神力默

佑禱畢卽分娩康寧無恙癸亥秋章敬復夢帝君臨家遂伏地叩首帝君問陰隲文註案完否章敬惶愧無地對以年荒力薄方欲興工醒卽謄稿付梓是夜熟睡反側間有簪脚入目寸餘血染衾裯痛無可比意以此目必瞎天明寐覺安然如故是歲之冬章敬以祖考四喪暴露與胞弟章程勉力安葬值奇寒歷水濤舟幾覆陷者數次俱禱於帝君而獲免又北鄉水涸擇十二月初七啓土至初六夜片磚塊灰不能抵墓是夜哀禱帝君明晨磚灰俱至陸地行舟若有

神助甲子十月妾張氏臨產艱難特甚舉家惶恐章敬禱於帝君禱畢分娩母子俱安丁卯秋痢疫流行家至戶到章敬上下俱病且盛章敬虔禱於帝君前願速竣丹桂籍印施廣布禱畢漸次痊安舉家康泰戊辰仲夏章敬患胃膈證飲食難下氣不能伸晝夜喘息寤寐不寧投藥不效十五日自禱於帝君夜卽夢帝君向東坐復向北立章敬叩之若有所許明晨遂覺氣喘平復飲食漸進服藥有功得康寧如故更有異者東郊鄭子香孩手鐫金經註解一部適與章

敬丹桂籍同梓於馬君梁家是秋鄭子之書先竣相繼而告成者章敬之丹桂籍也因覺丁巳之秋所夢秋高桂子和天香之句驚駭殊甚蓋天香二字正鄭子香孩之名噫一念之善上格九天其此謂歟

刻勸免溺

長洲柯炯奉帝君甚虔曾刻報應錄勸世一日駕舟至江橋鎮遇大風舟覆炯坐艙中不覺身出艙外蓬板等物俱無所礙遂得他舟救起遙見帝攜二童子竚立雲際若救護然炯後享福壽

力行成富

江西周志仁年踰四十貧困無聊一日往文昌宮虔禱帝前求賜福祿見壁間陰隲文惕然警醒誓願力行自是身心安泰事皆如意不數年間頓成巨富

妄毀聖像

福州孝廉林逸王元升累上春官不第心甚憤憤一日醉往梓潼廟見帝君像指而嫚罵曰今不作汝矣何為復在此受饗祀乎同上神座盡力推像踣跌粉碎二人回家大發熱帝君附體痛罵曰汝二狂生前

世作幾小福上帝報汝以孝廉且家貲不薄已過分矣何為狂妄放肆毀壞吾像惡至此極乎立付地府鞫治家人驚悸連夕壕起聖像卒不救而死

不敬字紙

仁和舊馬頭沈姓精堪輿人亦謹厚但不知敬惜字紙康熙八年壽五旬矣尚不之改忽一夜夢人攝至公府殿宇森嚴榜曰文昌殿堂懸一牌大書曰成人在字字在成人人不敬字字不敬人旁一人喝曰知未沈驚覺悔悟述夢勸人未幾卒無子

鋤土得錢

康熙丙寅郡庠司訓范光燮建文昌閣鋤土得古錢一枚面篆天開文運四字背作筆錠蓮燈之形丁卯閣成做篆文懸額於閣明年戊辰修撰沈廷文遂大魁天下

修閣侵料

康熙癸酉嘉興學文昌閣頽圯司鐸募修命四生董其事一張姓文譽頗盛亦與焉私以修閣料值家用是秋邑人金子白館於吳門中秋夜夢迎浙江天榜

一朱衣前導入文昌殿子白隨入一一唱名至第幾名張某帝君拊案曰此子不當中擇下科應中者換之朱衣曰此子應中且榜已定奈何帝君曰即如嘉興修文昌閣此子侵用料物以修私舍即大不敬矣竟易之子白歸訪張友則三場甚得意且詫有神助自詡高第榜出竟不中至今困青衿中

產兒符夢

汪繼燦字倬雲未產時本生母太宜人黃氏禱於帝君廟夢帝君抱送一男兒既生頭角嶢嶢宛如夢中

兒後官吏科給事中巡視臺灣

祝湯延壽

青浦顧浣心康熙十年初夏星家推其祖母湯當壽
終于十月至是果病浣心虔禱帝君而愈

紫衣來迎

姑蘇胡旭彩生平不信因果康熙庚申六月偶讀訓
文惕然悔悟泣曰我一生恣憑曾臆損人利己今觀
果報彰彰不爽如此我罪通天矣遂願印施三千本
冀消夙孽及願方完偶染微疾謂家人曰頃假寐間

見文昌宮紫衣數人迎我未幾跌坐持帝君寶號不
輟瞑目而逝

壽帶解與

郭氏女常憂不壽叩請延年夜夢星官告曰我司祿
神也奉帝命賜汝腰帶解帶與之四圍皆作壽字

發願起癱

直隸有辛姓者年逾六旬病瘋癱疼痛不止滄州徐
皜偶至辛所備言帝君顯應諸事辛遂發願云我惡
疾年餘難起若得帝君顯佑得痊終身普勸以廣聖

德發願畢忽然踴躍行動如常

誦訓補餼

嚴州喻大成每晨跪誦訓文無間年十五入泮繼卽補餼壬午鄉薦後刻訓文自述其驗

舉念痊健

華亭宋學祁室人沈氏患傷寒并小產昏迷兩晝夜諸醫束手虔禱帝君立願刊施陰騭文三千張卽愈紹興金維陞母阮氏於康熙癸卯夏染熱病劇甚服藥罔效乃與弟維陞虔禱於帝君前願施陰騭文五

千張是夜母病卽愈

澄江夏芝生客居京邸因念七旬老母久缺奉侍康熙癸卯七月望日叩帝君前告許施陰騭文萬張祈母長壽康健未幾家信至云母患發背已久于七月望日忽然而愈

直隸涿州有刑書沈鹿鳴奉官差上京適妻病危篤鹿鳴詣帝君前誓改前非力行善事許施陰騭文萬張晚見家童至云主母已故卽奔回而妻復生驚問之妻云昨行至中途見值日功曹言汝夫已有善願

得以復生時康熙三年閏六月十九日也

揚州劉君安爲吏部從事母隨居京得病昏迷劉架
桌爲臺五鼓登臺望帝君祈禱願刊施陰騭文二萬
張少頃母卽甦醒云我被一卒擄去與披髮垢面者
百餘人同行忽一神至言奉文昌命單釋我一人回
家如夢初醒病遂愈君安妾患嘔血不止名醫束手
願施訓文三千張妾昏憤中見一瘵婦在牀際徘徊
數次從窓縫鑽出血證卽止

吳江王載字咸平於康熙丙辰歲八月長男孫晃忽
邁危疾醫治無門憶前刊布陰騭文仗帝君神靈得
起者歷有奇驗遂發心虔禱願刊施三千紙以丐一
命歸而昏眩立止

山陰俞允在京抱病熱極昏迷不醒人事戚人金伯
益詣帝君前虔祝云俞允病痊卽刊施陰騭文是夜
允夢帝君端坐一藍衣朝服老人執籍稟云俞允病
危求救如何發落帝君許增壽一紀醒卽病減數日
而愈

山陰金伯益妻搖氏屢遭難產無子一日小產腹痛

欲絕願施陰騭文萬頁是夜搖夢亡僕促之偕去惶遽莫解一神人叱僕去卽愈

范啓運染黃病五載漸至飲食不進危在朝夕龔璋勸其刊施陰騭文啓運卽齋戒三日時壬寅二月朔叩祝帝君前願刊施一萬張禱畢覺精神頓爽黃病遂愈

江暄嘉邑人甫弱冠虔奉文昌帝君因姊病印施陰騭文祈姊愈姊隨起暄夢帝君召之曰汝女兄病愈矣益宜堅心力行陰騭慎勿有始無終也寤而儆惕

復施印萬張

張國輔於康熙戊申年患目疾醫藥不效因虔禱於帝君前願刊施陰騭文萬張刊刻甫成目疾旋愈金以祥偶患血證服藥不效客寓峽石鎮適見帝君陰騭文遂發願刊施以廣聖訓方舉念而病卽漸愈錢桂徵患火證每作字數行頭目皆疼立願手書陰騭文三百通方舉筆病不復作

國學王棟得怪疾百藥不效許施寶訓勿藥自痊金達生癆傷六載願印施陰騭文五千紙夜見聖像

現前不日全愈

張斯介傷寒甚危有勸之施訓文者張允諾夜夢一王者賜旗一面病隨愈

吳江金楚谷子患痧疹願施陰騭文疏方焚而疾減
仁和嚴啓元女患風痰暈絕二次元跪誦訓文許施
三千紙卽愈

邵招官患痢其母許施寶訓招官忽在牀強起似以
首叩神者數四痢頓止

隨願科嗣

三韓陸以恬以館俸刷八千卷康熙乙卯登鄉薦

仁和楊荀奉訓文甚謹子春弱冠登第

陳裕菴公車北上過涿州見壁間寶訓願刻萬張以
祈聯第後果報捷

紹興陶延先五旬無子願施陰騭文萬張數年妻妾
生三子

鹽官丁永清四旬無子因日誦陰騭文二年連舉二
子康熙丁亥長子患腹毒許願刊布卽愈

王三水艱於嗣續止一子甚羸願施陰騭文萬張子

姓縣延

部郎劉登魁暮年乏嗣刊送陰隲文即得一子

輔相函

天聾地啞

王遠蠡海集云梓潼文昌帝君從者曰天聾地啞
蓋帝君不欲聰明之盡用故假聾啞以寓意周廣
業云帝君從者出像搜神記稱為左右桂祿二籍
仙官大洞錄稱為掌桂籍童子必用聾且啞者蓋
謂地本無言天寧有耳祇視人之自為而已或曰
帝君職掌科名欲使知者不能言言者不能知示
祕密也其用童子亦此意

勇義侯

周良翰記云一夕夢冠而法服者甲而持斧者知爲神君勇義侯也出像搜神記云宋封佐神爲英惠忠烈翼濟福安王卽報喜太尉也衛琪大洞經注云左司獨孤氏掌文昌左班封廣佑嘉應昌澤孚惠王右司李斌掌文昌右班封英惠忠烈翼濟正佑王周廣業云大洞錄所載儲佐列神署文昌銜者三十三員此蓋其一也吳山宋刻碑有武士披甲操鉞佩劍一手握訣隨白騾而行意卽是神

亦稱義勇司或曰千勝將軍

朱衣

趙德麟侯鯖錄云歐陽脩知貢舉每閱卷坐後覺有一朱衣點頭然後其文入格不爾則無復與考始疑侍吏及回視一無所見因語同列三歎嘗有句云文章自古無憑據惟願朱衣暗點頭又云青夜夢中糊眼處朱衣暗裏點頭時周廣業云案朱衣之神始見於此而林承天靈應觀記中有翼以梓潼真祠朱仙閔閣之句則宋理宗端平年間已

祀朱仙也

左右二仙官

明世宗朝建金錄大醮主法張真人伏壇奉表白
 子至午方起上問故對曰此表須經文昌府因左
 右二仙官不到耳問仙官何人曰孝子姜詩董永
 也周廣業云案帝君累行昨生無非忠孝故左右
 亦必以孝子居之斯與執蓋冒花侍晨交佩者異
 矣顧文昌宮職秩甚多載大洞錄者不具論近所
 聞者如杜喬林黃道周為右局大夫見杜真君記彭汝

諧為桂宮侍史

彭定求書懷詩注先曾祖蔚菴府君萬歷丙辰榜後即沒文昌玉局

降諭云府君為桂宮侍史案汝諧萬歷丙辰進士官行人

又吳震方述異記云

松江金孝廉維寧戊辰會試初場交卷天尙未明

於明遠樓下遇宮詹沈繹堂先生

名荃華亭人順治壬辰進士

自言上帝命為文昌祿宰司科甲之職忽不見時
 主考徐健菴先生亦夢之明日得其令嗣宗敬卷
 中式吳陳琰曠園雜誌云宣城高檢討詠夢人引
 至文昌宮以第三座命之曰可坐此後自知死期
 則今之隸職文昌者亦已多矣類紀於此以備叅

考

如意 按化書云帝君詔詣玉京玉帝以所執之杖賜之曰此如意也帝旨若曰咨爾孝仲萬靈之雄忠孝全節世資爾功賚汝斯杖無所不通帝君欣然受之以之自隨無適不可因至越嶲托生後姚萇至蜀假以鐵如意一麾旗幟蔽天戎馬萬餘白驢 按化書云帝君以旱祈雨親書官銜移文海神乃見使者呼帝君爲運判促上白驢風雨聲中頓失鄉地入大穴中宮庭明敞父母以下血肉

皆在一夕雨澤大作改過齋雜記云京城外慈壽寺西有玄福宮文昌祠前銅鑄一驢傳是宣德年造遊人以手摩挲銅質呈露其色甚瑩徐志莘銅驢歌云辨色但驚眼的爍錯采果異光陸離三百年來無損益獨騰寶燄從文狸足徵帝君象外力雲旗擁護繫羈

瑤冊函

文帝誥

純一顯應天尊誥一

本來吳會今鎮蜀都文衡專四海之權宰輔佐三清
 之上執虎符而握龍券三教遵承飛鳳篆而著鸞書
 九天開化掌天上星辰之籍判人間桂祿之司人世
 宗師混元內輔大悲大願大聖大慈文昌司祿純一
 顯應天尊

消魔護國天尊誥二

威光自在道德無爲南極長生真王永祐靈應大帝
一月現影於千江千載審諸於一日文治昭宣濬發
奎壁之府賢才輩出不炳江漢之靈神而明之道則
高矣大悲大願大聖大慈文昌司祿消魔護國天尊

消劫行化天尊誥三

紫巖學士黃雲大夫主宰長樂天君不驕樂育大帝
文昌祕典掌九天司祿之權衡大洞仙經闡七曲真
仙之治化聖子神孫而箕裘孝業玉妃仙眷而踵武
孝區蘊奧難名稱揚莫盡大悲大願大聖大慈文昌

司祿消劫行化天尊

注祿定籍天尊誥四

混元內府英顯上仙大都督府三清宰洞照通真天
台丈人五氣君編修列籍職司貢舉當選試而定高
卑祿掌天人授佩籙而消魔障語大莫能載語小莫
能破黜陟無私古今有賴大悲大願大聖大慈文昌
司祿注祿定籍天尊

慈悲應感天尊誥五

玉清內境清淨道真身現紫雲巖手持如意杖蘊妙

疑玄故造化生成默而有應含精毓秀於陰陽消長
合以無為自流行符張翼之精累宏教翊君臣之道
神人共賴隱顯弗違大悲大願大聖大慈文昌司祿
慈悲應感天尊

寶光慈濟天尊誥六

神文聖武孝德忠仁筆端無一事不言分身無一人
不應九十七化之昭乎日月億千萬劫之拯乎黔黎
全忠孝之大倫示臣子之彝式萬方是憲一視同仁
大悲大願大聖大慈文昌司祿寶光慈濟天尊

靈感慈應天尊誥七

金闕上相檢校太師都統三界陰兵總理諸天星曜
判桂祿嗣籍收嶽瀆真形虎符龍券為元皇之真人
鳳闕豹關作妙玄之丞相德已至矣民皆仰之大悲
大願大聖大慈文昌司祿靈感慈應天尊

隨願靈應天尊誥八

佐天行化助國救民誠心接物乃眾派之祖師藏用
顯仁實萬天之教主掌三界獄事驅馘瘟邪總十二
河源運使水府以先覺而覺後覺彌玉皇而協元皇

歷代尊崇十號圓滿大悲大願大聖大慈文昌司祿
隨願靈應天尊

輪迴救苦天尊誥九

譚經演教通幽徹明存欽恤心管天地水三界囹圄
行便宜事掌過見未六道輪迴混元造化賴以綱維
冲漠飛仙資之編集證果安樂定慧王菩薩妙號釋
迦梵鎮如來大悲大願大聖大慈文昌司祿輪迴救
苦天尊

澄真正觀天尊誥十

桂香寶殿文昌上宮九十六生種善果於詩書之圃
百千萬化培桂根於陰隲之田自雷杼炳靈於鳳山
至如意儲祥於鰲岫開人心必本於篤親之孝壽國
脈必先於致主之忠應夢保生垂慈憫苦大仁大孝
大聖大慈神文聖武孝德忠仁王救劫大慈悲澄真
正觀天尊

更生永命天尊誥十一

不驕帝境玉真慶宮現九十七化之行藏顯億千萬
種之神異飛鸞開化於在在如意救劫以生生至孝

至仁功存乎儒道釋教不驕不樂職盡乎天地水官
功德難量威靈莫測大悲大願大聖大慈九天開化
主宰七曲靈應大帝談經演教消劫行化更生永命
天尊

釋迦梵鎮如來誥十二

混玄內輔三清內宰大都督府都統三界陰兵行便
宜事管天地水三界獄事收五嶽四瀆真形虎符龍
券總諸天宿曜判桂祿嗣籍上仙英顯元皇真人司
祿職貢舉真君預編修飛仙列籍掌混元造化輪迴

救苦無礙寶光紳一天尊九天定元保生扶教開化
主宰長樂永祐靈應大帝定慧證果釋迦梵鎮如來
純一顯應天尊誥十三

金闕上相檢校太師混元內輔三清上宰大都督府
都統三界陰兵行便宜事管天地水三界獄事收五
嶽四瀆真形虎符龍券總諸天星曜判桂祿嗣籍上
仙英顯元皇真人司祿職貢舉真君洞照通真先生
編修飛仙列籍掌混元造化輪迴六道救苦救難慈
尊玉清內境清淨道真身現紫雲巖手持如意杖統

御萬靈普濟諸苦大仁大孝大聖大慈無上不驕樂
育天帝都總混天誠心接物萬靈教主隨願慈應天
尊九天定元保生扶教輔元開化文昌度人主宰長
樂永祐靈應大天帝君掌五湖四海總十二河源水
府運使定慧王菩薩證果釋迦梵鎮如來澄真證觀
注祿定籍寶光慈應治世顯道保安拔罪更生永命
扶善濟苦消劫行化純一顯應天尊

聖眷誥

聖祖母誥

始青天上元命化初一氣未滴含七曲真元之粹九
天肇始包三光精體之全鸞機無朕兆之可名鶴質
仰清高而莫議先天先地之慈母不古不今之婉容
陽回十月五日之春教演三綱五常之祖壽緜長壽
形賦元形載觀本行集之跋經莫測始青天之證道
大悲大願大聖大慈七曲初劫賦形長生聖母元君

聖父誥

桂香寶殿文昌上宮道體混成合九十餘生之化真
元未露儲三萬六千之精開後天不老之鸞書奉青

霄莫測之熊夢神父之大慈父至人之上善人脉壽
三綱五常之根心包百行萬善之體歸依莫盡稱讚
何忘大悲大願大聖大慈七曲神父顯應慈佑仁裕
令德王證果長壽王菩薩儲真衍慶天尊

聖母誥

桂香內殿文昌上宮淑質春和舍太真之淑氣清光
秋湛蘊七夕之清輝包龍像於未滴隱鸞機於不露
劍泉之大慈母蓬萊之上善人產萬世之綱常生九
天之名教歸依莫盡稱讚何忘大悲大願大聖大慈

七曲神母昭德積慶慈懿恭惠夫人證果保光菩薩
嗣慶儲祥元君

聖后誥

桂香內殿文昌輔宮懿範冰清掬九天之霽月仁心
春粹扇七曲之家風婉儀日侍於親闈慈淑天全於
母道上下一堂之和氣古今萬世之春臺應夢儲祥
因心演化大仁大孝大聖大慈恭順淑應德惠昭懿
皇后證果定慧菩薩冲和洞妙元君

聖長子誥

桂香內殿文昌輔宮聖德慈祥一念嗣家聲之脈神
功顯著九天寬帝父之心戲綵雲巖詳無體無聲之
禮樂問安月窟傳有典有則之箕裘錫五福於生生
仁孝之家榜三元於奕奕詩書之裔因心立教應夢
儲祥至仁至孝至聖至慈聖長子嗣德履孝王文昌
衍慶真君

聖長婦誥

桂香內殿文昌輔宮淑質春柔粹婉容於侍問真心
玉潔儼懿範之清高相成震長之家聲默識兌和之
閩則教流愷悌化洽冲和應夢儲祥因心錫慶至仁
至孝至聖至慈聖長婦助善顯懿循孝夫人文昌靜
應天君

聖次子誥

桂香內殿文昌輔宮父子一家全克孝克慈之道君
臣千載盡止仁止敬之心模範人文本綱常而立教
準繩世道根詩禮之趨庭幹蠱於陰隲之天福謙於
行藝之圃因心演化應夢儲祥至仁至孝至聖至慈
聖次子昌德立孝王文昌司祿真君

聖次婦誥

桂香內殿文昌輔宮孝德謙柔稟一元之淑質真心
坤順婉七曲之閨儀五婦嶺前揭問安之華典三潮
水上流積慶之清源應夢儲祥因心演化至仁至孝
至聖至慈聖次婦助順惠懿克孝夫人文昌嗣慶天
君

懿孝公主誥

桂香內殿文昌輔宮蟾魄凝祥根父天之慈愛鸞心
歛福陶母德之雍和霜姿雪質之清不物於物春風

秋月之抱自天其天內觀萬境之空幼得九天之道
心清莫議德婉難名至仁至孝至聖至慈淑真妙靜
懿孝公主文昌萬壽天君

聖長孫誥

桂香內殿文昌輔宮凜凜天姿道矩肅家聲之粹挺
挺風烈仁聲流治化之新雷霆間發於春和人人開
悟雨露旁周於天表物物生成應念儲祥炳靈應夢
至仁至孝至聖至慈聖長孫紹應昭靈至孝侯文昌
積慶真人

聖長孫婦誥

桂香內殿文昌輔宮聖質天姿粹出春風之抱仙標
道矩豁開秋月之清四世一堂印印閨儀之雍肅百
行萬善天天佳慶之精詳應夢炳靈隨機演化至仁
至孝至聖至慈聖長孫婦淑應紹孝夫人文昌積慶
天君

聖次孫誥

桂香內殿文昌輔宮談笑春風字字仁風之發育動
容和氣言言家法之流傳子承聖子之心根培陰隲

孫繼神孫之體果證真仙應夢儲祥因心立教至仁
至孝至聖至慈聖次孫承應宜靈順孝侯文昌襲慶
真人

聖次孫婦誥

桂香內殿文昌輔宮玉質金姿父母熟栽培之地恩
光化日子孫緜嗣續之天生根榮陰隲之根內資相
警休命續衣冠之命婉質相成應夢儲祥隨機演化
至仁至孝至聖至慈聖次孫婦慧應體孝夫人文昌
襲慶天君

聖誕考

帝君二月初三日誕聖祖母十月初五日誕聖父二月十一日誕聖母七月初七日誕聖后五月初三日誕聖長子三月初三日誕聖長婦八月初一日誕聖次子正月初一日誕聖次婦二月十八日誕懿孝公主四月十六日誕聖長孫七月初三日誕聖長孫婦正月二十八日誕聖次孫十月十三日誕聖次孫婦七月二十三日誕每逢聖誕之日宜齋戒

聖位考

帝君聖位證金闕太師昊天檢校洞照通真先生九天開化主宰靈應大天帝上仙元皇君聖后證恭順淑應德惠昭懿皇后冲和洞妙元君聖祖母證初劫賦形長生聖母元君聖父證顯應慈祐仁裕令德主證果太元初帝儲真衍慶天尊聖母證昭德積慶懿恭惠妃嗣慶儲祥元君聖長子證至仁至孝至聖至慈嗣昌履孝王文昌衍慶真君聖長婦證助善應懿循孝夫人文昌靜應天君聖次子證至仁至孝至聖至慈嗣昌立孝王文昌司祿真君聖次婦證助順惠

懿克孝夫人文昌嗣慶天君聖女證淑貞妙靜懿孝
公主文昌萬壽天君聖孫證紹應昭靈至孝侯文昌
積慶真人聖孫婦證淑應昭孝夫人文昌積慶天君
聖次孫證承應宣靈順孝侯文昌襲慶真人聖次孫
婦證惠應體孝夫人文昌襲慶天君

詔彙

周司諫詔曰咨爾善勲直情無隱朕念良醫活人太
醫活國今置爾言路以旌汝賢汝其以救疾之心救
正吾失嗚呼惟良藥苦口利於病忠言逆耳利於行

汝往欽哉毋易所守賜如意杖詔曰咨爾孝仲萬靈
之雄忠孝全節世資爾功賚爾斯杖無所不通特加
金闕太師詔曰文昌者教化之本源實傳列聖之業
儒士者大德之淵藪宜推一德之忠播告諸天亶孚
有衆惟文昌司祿主者職貢舉真君衛民少傅靈應
帝君張某德被萬物威形四方粵自有生顯從浩劫
順考古道鑑觀人文照臨竝日月之明發生贊乾坤
之化是以教耕稼而民人育每裁制而自優修禮樂
而政事康果猷爲之不謬干戈載戢陰陽常和水土

既平休祥時格託之庶務試以諸難皆濟濟以可觀
每多多而益辦昔自水漕今蒞台衡尚持拔苦之心
誓拯倒懸之念厥有成績巍乎難名察乎九十餘化
之行藏命編諸冊著以萬二千端之行節豈曰空文
顛則持而危則扶惡以懲而善以勸下民允賴惟乃
之休况復恢龍漢之圖書闡鸞臺之典則欲分身而
顯化率諸聖以混融萬梵開張三界均利宜加峻位
俯叶輿情名躋南極之尊禮絕星聯之上於戲躋三
階而下太乙允彰應物之符歛五福而錫庶民式賴

師言之佐誰其能者汝往欽哉可特加金闕昊天太
師糾察三界禍福事

國春秋云姚萇稱帝立張相公廟祀之萇於帝君未聞封爵其言蓋難據也

僖宗廣明二年加號濟順王

太平寰宇記曰廣明二年僖宗幸蜀神於利州桔柏津見封爲濟順王親幸其廟解劍贈神太平廣記云僖宗幸蜀日神自廟出十餘里列仗迎駕白霧之中髣髴見其形因解佩劍賜之祝令効順指顧賊平駕迴廣贈珍玩人莫敢窺王鐸有詩刊石曰夜雨龍拋三尺匣春風鳳入九重城其時靈跡

互見於化書方輿勝覽及普應函中詳畧頗殊

宋真宗咸平四年改號英顯王額曰靈應

文獻通考曰咸平中王均爲亂官軍進討忽有人登衝梯指賊大呼曰梓潼神遣我來九月二十日城陷爾輩悉當夷滅賊射之倏不見及期果克城招安使雷有終以聞詔改王號修飾祠宇仍令少府造衣服法物祭器

哲宗元祐三年加號輔元開化文昌司祿帝君

西湖遊覽志曰神初祀於蜀宋元祐三年加封輔

元開化文昌司祿帝君按宋世封號甚多周良翰神繁廟碑稱英顯武烈王陳師中章森碑稱英顯武烈忠佑廣濟王三碑刻於紹興淳熙間與事實所言加封至八字王者正合特封年無考耳明一統志又云宋建炎以來累封神文聖武孝德忠仁王

元加號輔元開化文昌司祿弘仁帝君改祠額曰右文開化

通紀曰其封年成都誌在延祐間出像搜神記直

云仁宗延祐三年七月加封考衛琪大洞經註於武宗至大三年七月表上註文已如此則非延祐甚明元史褒崇神號始見於成宗紀意其在元貞年也

明憲宗成化十三年改額曰護國文昌帝君

通紀曰按帝君自宋孝宗隆興之歲至淳熙甲子疊奉玉冊進受帝封寶誥瑯函褒及聖眷見道藏甚詳出像搜神記又載宋太祖封帝父母及子孫皆為侯王其懿號與誥文互異茲錄歷朝錫典必

據禮書其餘皆闕如也

附 祀典

唐始賜祀於蜀

通紀云按廟必有祀帝君鐘鼓之饗蓋始善板矣
 然雷杼上自民間猶私祭也姚秦重立秩祀未聞
 唐李玉溪詩始有下馬捧椒漿迎神白玉堂之句
 玉溪入蜀在宣宗大中間同時孫可之亦製祭文
 意明皇錫爵之後祀事孔明也至僖宗親幸其廟
 贈劍加封親製祝文以祭故敘賜祀斷自唐云
 宋詔以英顯王廟纂入祀典

通紀云按宋史諸祠廟自開寶皇祐以來凡天下名在地志功及生民宮觀陵廟名山大川能興雲雨者并加崇飾增入祀典文獻通考英顯王廟載在郊社考其時修祠宇造祭器雖儀制不詳祀典修明可知矣

明制歲二月三日遣官致祭

續文獻通考云景泰五年勅賜文昌宮額歲以二月初三日為帝君誕生之辰遣官致祭

大清有司致祭

洛陽縣志云文昌祠祭期儀品同文廟兩廡祭期

每歲春秋上丁日祭品帛一色白豕首一簋一

籩四豆四銅爵一儀注承祭官就案前立贊引官

贊跪叩興承祭官一跪一叩頭興贊引官贊奠帛

捧帛官跪進於案左承祭官接帛拱舉立獻案上

贊引官贊獻爵執爵官跪進於案左承祭官接爵

拱舉立獻案上行一跪一叩頭禮興贊引官贊詣

讀祝位承祭官詣讀祝位立讀祝官至祝案前一

跪一叩頭捧祝版立於案左贊引官贊跪承祭官

在宮記 卷八
跪贊引官贊讀祝讀祝官讀祝讀畢捧祝至案上
跪安帛匣內一叩頭退贊引官贊叩興承祭官一
叩頭興贊引官贊詣燎位承祭官詣燎位舉祝帛
焚訖禮畢不奏樂用鼓吹 祝文曰斗前六星總
司祿命孝友忠仁勸士惟敬騰蛟起鳳佑助斯文
崇茲臺閣帝用式憑

文壽函

遺蹟

金馬山

在越嶲衛治南山下有帝君親書湧泉月明四大字
於石上今存

七曲山

在梓潼縣北一十五里山腹有路盤轉七曲故名

鳳凰山

在梓潼縣東峰巒起伏狀若鳳凰清河內傳云山連

劔嶺而撐參宮若鳳凰之偃是也

雷柱

梓潼縣帝君祠民歲上雷杼十枚今風洞門石尚稱雷柱

演兵壩

在梓潼縣南十里相傳姚萇入蜀帝君假以鐵如意曰麾之可致兵萇未信帝君為之一麾戈盾戎馬萬餘列之平坡即此地

盤陀石

在七曲山忠孝樓北重階上

晉柏

在盤陀石側柏二株蒼翠奇古盤踞如虬龍自晉至今幾三合抱今止一株明萬曆間徽州學正趙彥記畧云七曲山來自漢陽三百里許至七曲而山脉稍露為盤陀石石腦後有晉柏高五丈餘圍計高之一巔如龍如鳳根如石如距其腹堅實而膚肥潤雖帝君亦云故舊來訪余先敲晉柏則知此柏與帝君俱生矣非神物呵護能若是哉余愛重之刊石為欄用

告後人俾知此柏之重於此山此廟者有自來矣

望水亭

在忠孝樓前一里許亦帝君遺蹟其先龍安蕭氏重修年遠傾圮乾隆癸酉知縣朱簾重建八面砌石繚以石垣中奉聖像下臨潼江煙雲繚繞一邑巨觀

側身碑

七曲山帝君像冶鐵以肖者也唐玄宗幸蜀道經七曲拜謁帝像忽自左側右似不受拜者邑人以爲異立碑記之名曰側身碑

玉女房

在保寧府城東三里今閩中蟠龍山南有石長四十二丈高五尺當中有門若人之掩關然

邛池

在雋州越巂縣東南地陷爲汗澤因名爲邛池南人以爲邛河縱廣二十里深百餘丈蜀都賦云異斯邛池帝君載止血蛇吸馬迂而匪詭騾臥有痕帝筆則
咳

參龍池

在梓潼縣北三十里相傳帝君顯靈蹟處舊有廟今廢

靈應洞

在四川黎州安撫司城北邛崃山洞有巨蛇蜿蜒錦文蟠其中人號靈應將軍

紫府飛霞洞

在雅州名山縣治東南一里帝君親遊處有紫府飛霞洞記親筆碑文尙存宋開禧丁卯邑人苟洙於梓潼觀後甃一洞穴刻帝君父母像并鑿石龍蟠其中

請帝君作記帝君親書於石今石龍書院是也

附墓宮

隆慶墓

靈應大帝事實曰墓在隆慶府梓潼縣東二十里圖志云墓在隆慶府陳仲醇廟記亦稱其墓

善板祠

華陽國志云梓潼縣有五婦山故蜀五丁士所拽蛇山崩處有善板祠民歲上雷杼十枚歲盡不復見云雷取去通紀云按此梓潼著蹟之始也蓋善板之立自在秦漢之世未詳何義而周禮司書掌邦中之版

大胥掌學士之版皆謂簿籍此稱善板者其掌善士之籍歟

張相公廟

見聞錄云姚萇遊蜀至梓潼嶺上憩于路傍有布衣來謂萇曰君宜早還秦秦人將無主康濟者其在君乎吾張亞子也他日勿相忘萇還後果稱帝於長安因命使至蜀求之勿獲遂立廟於所見之處今張相公廟是也

梓潼文昌靈應祠

方輿勝覽云在梓潼縣北八里七曲山明一統志云自秦伐蜀以後世有靈應梓潼縣志云雍正四年冬正殿拜廳鐘鼓樓廟門忠孝樓燬於野燒十年四川布政使前邑令劉應鼎倡募重修十三年果親王來蜀謁祠題額云張翼精英聯云列天上星精兩字傳心惟孝友掌人間祿籍千秋大業在文章祠內舊有聯云七十三化身閱盡人世間顯晦升沉大富貴莫非命真造化不論文若無一點丹心未許誇談將相千百年法眼看破古今來窮通得喪老頭巾莫怨天

狂後生休使性但裕六經實學自然唾手功名燬於
火乾隆四十年知縣朱簾重刊揭通紀曰按是祠即
華陽國志所稱善板者所從來甚遠化書言蜀主魚
鳧先為立廟郭北開明毀之秦既并蜀郡民張威復
建殆其是乎見聞錄謂姚萇立廟於所見之地特鼎
新之耳唐號張相公廟宋號靈應皆此也

文昌行祠

梓潼縣志云在縣治南明嘉靖年建邑人兵科給事
中何光裕記又七曲山後玉馬岡縣東三十里楓香

溝并有行祠俱明萬曆時建

黎雅廟

梓潼縣志云縣西北六十里龍頂山上有三層中層
觀音閣後一洞深丈餘寬五尺內有帝君石像兩傍
有石門相傳為紫府飛霞洞下層文昌閣石柱十二
木柱四建在江梓大道上內奉帝像明時建

在名山縣
此特假名

成都文昌宮

成都志云在江濱廟之右洪武中蜀獻王肇封命道

士王清字卽舊址建殿宇門廊及家慶樓天順三年
按察司僉事劉福重修翰林編修江朝宗爲記

越嶲文昌祠

陳氏類書云四川越嶲衛治南文昌帝君降生之地
有祠焉卽化書所稱誕於越嶲之間也通紀云按帝
君蜀人廟祀於蜀尤盛而梓潼實爲鼻祖成都府新
越嶲又榆里也故首載之全蜀郡縣志稱成都府新
繁治東北有文昌觀蓋卽周良翰作記者又順慶府
儀隴治南五十步有文昌樓渠縣梓潼宮西充治東

孝廉山文昌祠敘州府富順縣西文昌觀重慶府治
文昌祠後有桂香樓馬湖府治東文昌宮播州宣慰
司治東鳳山有宋建文昌祠黎州安撫司治前文昌
祠又稱元虞集有蓬州相如縣文昌萬壽宮記方洲
作志在明嘉靖時所載如此以今通志較之數且倍
蕪而載在他郡邑志者更千百焉不勝紀也

京師文昌宮

明一統志云在順天府西南景泰五年因舊重建日
下舊聞云在北城靖恭坊有勅建碑大興縣志云文

昌宮梓潼廟俱在靖恭坊一在文昌宮街

弘仁萬壽宮

在南城明萬歷四十三年勅建中爲文昌殿額曰崇真保道左祀諸葛武侯右祀文信國公有神宗御製碑

杭州吳山文昌祠

臨安志云梓潼帝君廟在吳山承天觀端平三年建按帝君初祀於蜀宋嘉熙間蜀破民多徙錢塘遂建廟焉元末燬明初重建大清康熙二十五年燬巡撫

都御史金鉉復建乾隆二十七年春聖駕臨幸額曰斗匡司化

丹徒梓潼庵

丹徒縣志云在文昌坊梓潼巷唐時建順治十一年僧海曙重修

壽昌梓潼真君行祠

嚴州府志云在縣西蘄山上相傳宋時每遇賓興諸士子皆會集奠獻於祠以卜科名無不驗者通紀曰按自宋元以來帝君行祠徧列海內規制非一大率

穹窿而方正者曰文昌宮閔遠而周繚者曰文昌殿
重屋而四阿者曰文昌閣供奉香火曰文昌祠栖設
形貌曰文昌廟凡通都大邑名山勝水以及文廟左
右書院中堂士人文社皆嚴事之甚至佛藍道化亦
爲搏土範金鄉塾家堂靡不瞻儀懸影所謂千百萬
化者視此矣茲以蜀中降誕之鄉京師首善之地吳
山曾邀翠華臨幸天藻輝煌兩浙人士瞻仰肅敬理
宜并紀丹徒創建于唐壽昌著靈於宋爲郡邑所僅
有因附存焉

